


गाहासत्तसई



शालिवाहन हाल

गाथासप्तशती

शालिवाहन हाल



पसुवइणो रोसारुणपडिमासंकंतगोरिमुहअंदम् ।
गहिअग्घपंकअं मिअ संझासलिलंजलि णमह ॥१॥

अमिअं पाउअकव्वं पढिउं सोउं च जे ण आणंति ।
कामस्स तत्तत्ति कुणंति ते कह ण लज्जति ॥२॥

सत्त सआइं कइवच्छलेण कोडीअ मज्झआरम्मि ।
हालेण विरइआइं सालंकाराण गाहाणं ॥३॥

उअ णिच्चलणिप्पंदा भिसिणीवत्तम्मि रेहइ वलाआ ।
णिम्मलमरगअभाअणपरिट्ठिआ संखसुत्ति व्व ॥४॥

ताव च्चिअ रइसमए महिलाणं विव्भमा विराअंति ।
जाव ण कुवलअदलसच्छहाइ मउलंति णअणाइं ॥५॥

णोहलिअम् अप्पणो किं ण मग्गसे मग्गसे कुरवअस्स ।
एअं खु सुहअ तुह हसइ वलिअमुहपंकअं जाआ ॥६॥

ताविज्जंति असोएहि लडहविलआउ दइअविरहम्मि ।
किं सहइ को वि कस्स वि पाअपहारं पहुप्पंतो ॥७॥

अत्ता तह रमणिज्जं अंहं गामस्स मंडणीहूअं ।
लुअतिलवाडिसरिच्छं सिसिरेणकअं भिसिणिसंडं ॥८॥

किं रुअसि ओणअमुही धवलाअंतेसु सालिछेत्तेसु ।
हरिआलमंडिअमुही णडि व्व सणवाडिआ जाआ ॥९॥

सहि एरिसि च्चिअ गई मा रुव्वसु तंसवलिअमुहअंदं ।
एआण वालवालुंकिंतंतुकुडिलाण पेम्माणं ॥१०॥

पाअपडिअस्स पइणो पुट्ठिं पुत्ते समारुहंतम्मि ।
दढमण्णुट्ठमिआइ विहासो घरिणीअ णिवकंतो ॥११॥

सच्चं जाणइ दट्ठं सरिसम्मि जणम्मि जुज्जए राओ ।
मरउ ण तुमं भणिस्सं मरणं पि सलाहनिज्जं से ॥१२॥

रंधणकम्मणिउणिए मा जूरसु रत्तपाडलसुअंधं ।
मुहमारुअं पिअंतो धूमाइ सिही ण पज्जलइ ॥१३॥

घरिणीअ महाणसकम्मलगमसिमइलिएण हत्थेण ।
छित्तं मुहं हसिज्जइ चंदावत्थं गअं पइणा ॥१४॥

किं किं दे पडिहासइ सहीहि इअ पुच्छिआइ मुद्धाए ।
पढमुग्गअदोहलिणीअ णवर दइअं गआ दिट्ठी ॥१५॥

अमअमअ गअणसेहर रअणीमुखतिलअ चंद दे छिवसु ।
छित्तो जेहि जिअअमो ममं पि तेहिं चिअ करेहिं ॥१६॥

एहिज्ज सो पउत्थो अहअं कुप्पेज्ज सो वि अणुणेज्ज ।
इअ कस्स वि फलइ मणोरमाण माला पिअमम्मि ॥१७॥

दुग्गअकुडंवअट्ठी कह णु मए धोइएण सोढव्वा ।
दसिओसरंतसलिलेण उअह रुण्णं व पडएण ॥१८॥

कोसंवकिसलवण्णअ तण्णअ उण्णामिएहि कण्णेहिं ।
हिअअट्ठिअं घरं वच्चमाण धवलत्तणं पाव ॥१९॥

अलिअपसुत्तअ विणिमीलिअच्छ दे सुहअ मज्झ ओआसं ।
गंडपरिउं वणापुलइअंग ण पुणो चिराइस्सं ॥२०॥

असमत्त मंडण च्चिअ वच्च घरं से सकोउहल्लस्स ।
वोलाविअहलहलअस्स पुत्ति चित्ते ण लग्गिहिसि ॥२१॥

आअरपणामिओट्टं अघडिअणासं असंहअणिडालं ।
वण्णघिअलित्तमुहिए तीए परिउंवणं भरिमो ॥२२॥

आणासआइ देंती तह सुरए हरिसविअसिअकवोला ।
गोसे वि ओणअमुही अह से त्ति पिअं ण सद्धहिमो ॥२३॥

पिअविरहो अप्पिअदंसणं च गरुआइ दो वि दुक्खाइ ।
जीअ तुमं कारिज्जसि तीअ णमो आहिजाईए ॥२४॥

एक्को वि कालसारो ण देइ गंतुं पआहिण चलंतो ।
किं उण वाहाउलिअं लोअणजुअलं पिअअमाए ॥२५॥

ण कुणंतो च्चिअ माणं णिसासु सुहसुत्तदरविवुद्धानं ।
सुण्णइअपासपरिमुसणवेअणं जइ सि जानंतो ॥२६॥

पणअकुविआण दोण्ह वि अलिअपसुत्ताण माणइल्लाण ।
णिच्चलणिरुद्धणीसासदिण्णअण्णाण को मल्लो ॥२७॥

णवलइपहरं अंगे जहिं जहिं महइ देअरो दाउं ।
रोमंच दंदराई तहिं तहिं दीसइ वहूए ॥२८॥

अज्ज मए तेण विणा अणूहअसुहाइ संभरंतीए ।
अहिणवमेहाण रवो णिसामिओ वज्झपडतो व्व ॥२९॥

णिक्किव जाआभीरुअ दुद्दंसण णिंवकीडसारिच्छ ।
गामो गामणिणंदण तुज्झ कए तह वितणुआइ ॥३०॥

पहरवणमग्गविसमे जाआ किच्छेण लहइ से णिद्धं ।
गामणिउत्तस्स उरे पल्ली उण से सुहं सुअइ ॥३१॥

अह संभाविअमग्गो सुहअ तुए च्चेअ णवर णिव्वूढो ।
एणिहं हिअए अण्णं अण्णं वाआइ लोअस्स ॥३२॥

उण्हाइ णीससंतो कीस मह परंमुहीअ सअणद्धे ।
हिअअं पलीविउं अणुसएण पुट्ठिं पलीवेसि ॥३३॥

तुह विरहे चिरआरअ तिस्सा णिवडंतवाहमइलेण ।

रइरहसिहरधएण व मुहेण छाहि च्चिअ ण पत्ता ॥३४॥

दिअरस्स असुद्धमणस्स कुलवहूणिअकुट्टुलिहिआइ ।
दिअहं कहेइ रामाणुलग्गसोमित्तिचरिआइ ॥३५॥

चत्तरघरिणी पिअदंसणा अ तरुणी पउत्थवइआअ ।
असई सअज्जिआदुग्गआ अ णह खंडिअं सीलं ॥३६॥

तालूरभमाउलखुडिअकेसरो गिरिणईअपूरेण ।
दरवुडुवुडुणिव्वुडुमहुअरो हीलइ कलंवो ॥३७॥

अहिआइमाणिणो दुग्गअस्स छाइं पइस्स रक्खंही ।
णिअवंधवाण जूरइ घरिणी विहवेण एंताणं ॥३८॥

साहीणे वि पिअअमे पत्ते वि छणे ण मंडिओ अप्पा ।
दुग्गअपउत्थवइअं सअज्जिअं संठवंतीए ॥३९॥

तुज्झ वसइ त्ति हिअअं इमेहि दिट्ठो तुमं ति अच्छीइं ।
तुह विरहे किसिआइ ति तीए अंगाइ वि पिआइं ॥४०॥

सब्भावणे हभरिए रत्ते रज्जिज्जइ त्ति जुत्तम् इणं ।
अणहिअए उण हिअअं जं दिज्जइ तं जणो हसइ ॥४१॥

आरंभंतस्स धुअं लच्छी मरणं व होइ पुरिसस्स ।
तं मरणम् अणारंभे वि होइ लच्छी उण ण होइ ॥४२॥

विरहाणलो सहिज्जइ आसावंधेण वल्लहजणस्स ।
एक्कग्गामपवासो माए मरणं विसेसेइ ॥४३॥

अक्खडइ पिआ हिअए अण्णं महिलाअणं रमतस्स ।
दिट्ठे सरिसम्मि गुणे सरिसम्मि गुणे अईसंते ॥४४॥

णइपूरसच्छहे जोव्वणम्मि अइपवसिएसुदिअहेसु ।
अणिअत्तासु अ राईसु पुत्ति किं दट्ठमाणेण ॥४५॥

कल्लं किर खरतिअओ पवसिहइ पिओ त्ति सुव्वइ जणम्मि ।
तह वट्ठ भअवइ णिसे जह से कल्लं चिअ ण होइ ॥४६॥

होंतपहिअस्स जाआ आउच्छणजीअधारणरहस्सं ।
पुच्छंती भमइ घरं घरेण पिअविरहसहिरीओ ॥४७॥

अण्णमहिलापसंगं दे देव्व करेसु अम्ह दइअस्स ।
पुरिसा एक्कंतरसा ण हु दोसगुणे विआणंति ॥४८॥

थोअं पि ण णीइ इमा मज्झणहे उअ सरीरतललुक्का ।
आअवभएण छाही वि ता पहिअ किं ण वीसमसी ॥४९॥

सुहउच्छअं जणं दुल्लहं पि दूराहि अम्ह आणेंत ।
उअआरअ जर जीअं पि णेंत ण कआवराहोसि ॥५०॥

आम जरो मे मंदो अहव ण मंदो जणस्स का तत्ती ।
सुहउच्छअ सुहअ सुअंधगंध मा गंधिरिं छिवसु ॥५१॥

सिहिपिच्छलुलिकेसे वेवंतोरु विणिमीलिअद्धच्छी ।
दरपुरिसाईनि विसमिरि जाणसु पुरिसाण जं दुक्खं ॥५२॥

पेम्मस्स विरोहिअसंधिअस्स पच्चक्खदिट्ठविलिअस्स ।
उअअस्स व ताविअसीअलस्स विरसो रसो होइ ॥५३॥

वज्जवडनाइरिक्कं पइणो सोऊण सिंजिणीघोसं ।
पुसिआइ करिमरीए सरिवंदीणं पि अच्छीइ ॥५४॥

करिमरि अआलगज्जिरजलआसणिवडणपडिरवो एसो ।
पइणो धणुरव कंखिरि रोमंचं किं मुहा वहसि ॥५५॥

सहइ सहइ त्ति तेण तहा रमिआ सुरअदुव्विअट्ठेण ।
पव्वाअसिरीसाइ व जह से जाआइ अंगाइ ॥५६॥

अगणिअसेसजुआणा वालअ बोलीणलोअमज्जाआ ।
अह सा भमइ दिसामुहपसारिअच्छी तुह कएण ॥५७॥

अज्जं चेअ पउत्थो उज्जागरओ जणस्स अज्जेअ ।
अज्जेअ हलिद्वापिंजराइ गोलाइ तूहाइ ॥५८॥

असरिसचित्ते दिअरे सुद्धमणा पिअअमे विसमसीले ।
ण कहइ कुडुंवविहडणभएण तणुआअए सोणहा ॥५९॥

चिंताणिअदइअसमागमम्मि कअमणुआइ भरिऊण ।
सुण्णं कलहा अंती सहीहि रुण्णा ण ओहसिआ ॥६०॥

हिअअणुएहि समअं असमत्ताइं पि जह सुहावेंति ।
कज्जाइ मणे ण तहा इअरेहि समाणिआइं पि ॥६१॥

दरफुडिअसिप्पिसंपुडणिलुक्कहालाहलग्गछेप्पणिहं ।
पिक्कंवट्ठिविणिग्गअकोमलम् अंवंकुरं उअह ॥६२॥

उअह पडलंतरोइण्णाणिअअतंतुद्धपाअपडिलग्गं ।
दुल्लक्खसुत्तगुत्थेक्कवउलकुसुमं व मक्कडअं ॥६३॥

उअरिदरडिट्ठखण्णुअणिलुक्कपारावआण विरुएहिं ।
णित्थणइ जाअविअणं सूलाहिण्णं व देवउलं ॥६४॥

जइ होसि ण तस्स पिआ अणुदिअहं णीसहेहि अंगेहिं ।
णवसूअपीअपेओसमत्तपाडि व्व किं सुअसि ॥६५॥

हेमंतिआसु अइदीहरासु राईसु तं सि अविणिद्वा ।
चिरअरपउत्थवइए ण सुंदरं जं दिआ सुअसि ॥६६॥

जइ चिक्खिल्लभउप्पुअपअम् इणम् अलसाइ तूह पए दिण्णं ।
ता सुहअ कंडइज्जंतम् अंगम् एणिहं किणो वहसि ॥६७॥

पत्तो छणो ण सोहइ अइप्पहाए व्व पुण्णिमाअंदो ।
अंतविरसो व्व कामो असंपआणो अ परिओसो ॥६८॥

पाणिग्गहणे च्विअ पव्वइअ णाअं सहीहि सोहग्गं ।
पसुवइणा वासुइकंकणम्मि ओसारिए दूरं ॥६९॥

गिंहे दवग्गिमसिमइलिआइ दीसंति विंझसिहराइ ।
आससु पउत्थवइए ण होंति णवपाउसब्भाइं ॥७०॥

जेत्तिअमेत्तं तीरइ णिव्वोढुं देसु तेत्तिअं पणअं ।
ण जणो विणिअत्तपसाअदुक्खसहणक्खमो सव्वो ॥७१॥

वहुवल्लहस्स जा होइ वल्लहा कह वि पंच दिअहाइं ।
सा किं छट्ठं मग्गइ कत्तो मिट्ठं च बहुअं च ॥७२॥

जं जं सो णिज्झाअइ अंगोआसं महं अणिमिसच्छो ।
पच्छाएमि अ तं तं इच्छामि अ तेण दीसंतं ॥७३॥

दढमण्णुदूमिआइ वि गहिओ दइअम्मि पेछह इमीए ।
ओसरइ वालुआमुट्ठिओ व्व माणो सुरसुरंतो ॥७४॥

उअ पोम्मराअमरगअसंवलिआ णहअलाउ ओअरइ ।
णहसिरिकंठब्भट्ठ व्व कंठिआ कीररिछोली ॥७५॥

ण वि तह विएसवासो दोग्गच्चं मह जणेइ संतावं ।
आसंसिअत्थविमुहो जह पणइअणो णिअत्तंतो ॥७६॥

खंधग्गिणा वणेसुं तणेहि गामम्मि रक्खिओ पहिओ ।
णअरवसिओ णडिज्जइ साणुसएण व्व सीएण ॥७७॥

भरिमो से गहिआहरधुअसीसपहोलिरालआउलिअं ।
वअणं परिमलतरलिअभमरालिपइण्णकमलं व ॥७८॥

हल्लफलण्हाणपसाहिआण छणवासरे सवत्तीण ।
अज्जाइ मज्जणाणाअरेण कहिअं व सोहग्गं ॥७९॥

ण्हाणहलिद्वाभरिअंतराइ जालाइ जालवलअस्स ।
सोहंति किलिंचिअकंटएण कं काहिसि कअत्थं ॥८०॥

अइंसणेण पेम्मं अवेइ अइदंसणेण वि अवेइ ।
पिसुणजणकंपिएण वि अवेइ एमेअ वि अवेइ ॥८१॥

अइंसणेण महिलाअणस्स अइदंसणेण णीअस्स ।
मुखस्स पिसुणअणजंपिएण एमेअ वि खलस्स ॥८२॥

पोट्टपडिएहि दुक्खं अच्छिज्जइ उण्णाएहि होऊण ।
इअ चिंतताण मणे थणाण कसणं मुहं जाअं ॥८३॥

सो तुज्झ कए सुंदरि तह झीणो सुमहिलो हलिअउत्तो ।
जह से मच्छरिणीअ वि दोच्चं जाआइ पडिवण्णं ॥८४॥

दक्खिण्णेण वि एंतो सुहअ सुहावेसि अंह हिअआइं ।
णिक्कइअवेण जाणं गओ सि का णिव्वुई ताणं ॥८५॥

एक्कं पहरुग्घाअं हत्थं मुहमारुएण वीअंतो ।

सो वि हसंतीअ मए गहिओ वीएण कंठम्मि ॥८६॥

अवलंविअमाणपरंमुहीअ एंतस्स माणिनि पिअस्स ।
पुट्ठिपुलउग्गमो तुह कहेइ समुहट्ठिअं हिअअं ॥८७॥

जानइ जाणावेउं अणुणअविद्धविअमाणपरिसेसं ।
पइरिक्कम्मि वि विणआवलंवणं स च्चिअ कुणंती ॥८८॥

मुहमारुएण तं कण्ह गोरअं राहिआइ अवणेंतो ।
एआण वल्लवीणं अण्णाण वि गोरअं हरसि ॥८९॥

किं दाव कआ अहवा करेसि काहिसि अ सुहअ एत्ताहे ।
अवराहाण अलज्जिर साहसु कअरा खमिज्जंति ॥९०॥

णूमंति जे पहुंतं कुविअं दास व्व जे पसाअंति ।
ते च्चिअ महिलाण पिआ सेसा सामि च्चिअ वराआ ॥९१॥

तइआ कअग्घ महुअर ण रमसि अण्णासु पुप्फजाईसु ।
वद्धफलभारगरुई मालइम् एणिहं परिच्चअसि ॥९२॥

अविअण्हपेच्छणिज्जेण तक्खणं मामि तेण दिट्ठेण ।
सिविणअपीएण व पाणिएण तण्ह च्चिअ ण फिट्ठा ॥९३॥

सुअणो जं देसम् अलंकरेइ तं चिअ करेइ पवसंतो ।
गामासण्णुम्मूलिअ महावडट्ठाणसारिच्छं ॥९४॥

सो णाम संभरिज्जइ पब्भसिओ जो खणं पि हिअआहि ।
संभरिअव्वं च कअं गअं च पेम्मं णिरालवं ॥९५॥

णासं व सा कवोलेअज्ज वितुह दंतमंडलं वाला ।
उब्भिण्णपुलअवइवेढपरिगअं रक्खइ वराई ॥९६॥

दिट्ठा चूआ अग्घाइआ सुरा दक्खिणाणिलो सहिओ ।
कज्जाइ चिअ गरुआइ मामि को वल्लहो कस्स ॥९७॥


रमिरुण पअं पि गओ जाहे उवऊहिउं पडिणिउत्तो ।
अहअं पउत्थवइअ व्व तक्खणं सो पवासि व्व ॥९८॥

अविअण्हपेच्छणिज्जं समसुहदुक्खं विइण्णसब्भावं ।
अण्णोण्हिअअलग्गं पुण्णेहि जणो जणं लहइ ॥९९॥

दुक्खं देंतो वि सुहं जणेइ जो जस्स वल्लहो होइ ।
दइअण्हदूमिआण वि वड्ढइ थणआण रोमंचो ॥१००॥



द्वितीयशतकम्



धरिओ धरिओ विअलइ उवएसो पिअसहीहि दिज्जंतो ।
मअरद्धअवाणपहारजज्जरे तीअ हिअअम्मि ॥१०१॥

तडसंठिअणीडेक्कंतपीलुआरक्खणेक्कदिण्णमणा ।
अगणिअविणिवाअभा पूरेण समं वहइ काई ॥१०२॥

वहुपुप्फभरोणामिअभूमीगअसाह सुणसु विण्णत्तिं ।
गोलाअडविअडकुडंग महुअ सणिअं गलिज्जासु ॥१०३॥

णिप्पच्छिमाइ असई दुक्खालोआइ महुअपुप्फाई ।
चीए वंधुस्स व अट्ठिआइ रुअरी समुच्चिणइ ॥१०४॥

ओ हिअअ मडहसरिआजलरअहीरंतदीहदारु व्व ।
ठाणे ठाणे च्चिअ लग्गमाण केणा ऽवि डज्झिहिसि ॥१०५॥

जो तीअ अहरराओ रत्तिं उव्वासिओ पिअअमेण ।
सो च्चिअ दीसइ गोसे सवत्तिणअणेसु संकंतो ॥१०६॥

गोलाअडट्ठिअं पेच्छिऊण गहवइसुअं हलिअसोणहा ।
आढत्ता उत्तरिउं दुक्खुत्ताराइ पअवीए ॥१०७॥

चलणोआसणिसण्णस्स तस्स भरिमो अणालवंतस्स ।
पाअंगुट्ठावेढिअकेसदढाअट्ठणसुहेल्लिं ॥१०८॥

फालेइ अच्छभल्लं व उअह कुग्गामदेउलद्धरे ।
हेमंतआलपहिओ विज्झाअंतं पलालगिं ॥१०९॥

कमलाअरा ण मलिआ हंसा उट्ठाविआ ण अ पिउच्छा ।
केण वि गामतडाए अब्भं उत्ताणिअं ब्रूढं ॥११०॥

केण मणे भग्गमणोरहेण संलाविअं पवासो त्ति ।
सविसाइ व अलसाअंति जेण वहुआइ अंगाई ॥१११॥

अज्ज वि वालो दामोअरो त्ति इअ जंपिए जसोआए ।
कण्हमुहपेसिअच्छं णिहुअं हसिअं वअवहूहिं ॥११२॥

ते विरला सप्पुरिसा जाण सिणेहो अहिण्णमुहराओ ।
अणुदिअह वट्ठमाणो रिणं व पुत्तेसु संकमइ ॥११३॥

णच्चणसलाहणणिहेण पासपरिसंठिआ णिउणगोवी ।
सरिगोविआण चुंवइ कवोलपडिमागअं कण्हं ॥११४॥

सव्वत्थ दिसामुहपसरिएहि अण्णोण्णकडअलग्गेहिं ।
छल्लिं व मुअइ विंझो मेहेहि विसंघडंतैहिं ॥११५॥

आलोअंति पुलिंदा पव्वअसिहरट्ठिआ धणुणिसण्णा ।
हत्थिउलेहि व विंझं पूरिज्जंतं णवब्भेहिं ॥११६॥

वणदवमसिमइलंगो रेहइ विंझो घणेहि धवलेहिं ।
खीरोअमंथणुच्छलिअदुद्धसित्तो व्व महुमहणो ॥११७॥

वंदीअ णिहअवंधवविमणाइ वि पक्कलो त्ति चोरजुवा ।
अणुराएण पुलइओ गुणेसु को मच्छरं वहइ ॥११८॥

अज्ज कइमो वि दिअहो वाहवहू रूवजोव्वणुम्मत्ता ।
सोहगं धणुरुपच्छलेण रच्छासु विक्किरइ ॥११९॥

उक्खिप्पइ मंडलिमारुएण गेहंगणाहि वाहीए ।
सोहगधअवडाअ व्व उवह धणुरुपरिछोली ॥१२०॥

गअगंडत्थलणिहसणमअमइलीकअकरंजसाहाहिं ।
एंतीअ कुलघराओ णाअं वाहीअ पइमरणं ॥१२१॥

णववहुपेम्मतनुइओ पणअं पढमघरिणीअ रक्खंतो ।
अलिहिअदुप्परिअल्लं पि णेइ रणं धणुं वाहो ॥१२२॥

हासाविओ जणो सामलीअ पढमं पसूअमाणाए ।
वल्लहवाएण अलं मम त्ति बहुसो भणंतीए ॥१२३॥

कइअवरहिअं पेम्मं ण त्थि च्चिअ मामि माणुसे लोए ।
अह होइ कस्स विरहो विरहे होंतम्मि को जिअइ ॥१२४॥

अच्छेरं व णिहिं मिव सग्गे रज्जं व अमअपाणं व ।
आसि म्ह तं मुहुत्तं विणिअंसणदंसणं तिस्सा ॥१२५॥

सा तुज्झ वल्लहा तं सि मज्झ वेसो सि तीअ तुज्झ अहं ।
वालअ फुडं भणामो पेम्मं किर बहुविआरं ति ॥१२६॥

अहअं लज्जालुइणी तस्स अ उम्मच्छराइ पेम्माइं ।
सहिआअणो वि णिउणो अलाहि किं पाअराएण ॥१२७॥

महुमासमारुआहअमहुअरइअंकारणिब्भरे रण्णे ।
गाइ विरहक्करावद्धपहिअमणमोहणं गोवी ॥१२८॥

तह माणो माणधणाइ तीअ एमेअ दूरम् अणुवद्धो ।
जह से अणुणीअ पिओ एक्कगाम च्चिअ पउत्थो ॥१२९॥

सालोअ च्चिअ सूरु घरिणी घरसामिअस्स घेतूण ।
णेच्छंतस्स वि पाए धुअइ हसंती हसंतस्स ॥१३०॥

वाहरउ मं सहीओ तिस्सा गोत्तेण किं थ भणिएण ।
थिरपेम्मा होउ जहिं तहिं पि मा किं पि णं भणह ॥१३१॥

रूअं अच्छीसु ठिअं फरिसो अंगेसु जंपिअं कण्णे ।
हिअअं हिअए णिहिअं विओइअं किं थ देव्वेण ॥१३२॥

सअणे चिंतामइअं काऊण पिअं णिमिलिअच्छीए ।
अप्पाणो उवऊढो पसिढिलवलआहि वाहाहिं ॥१३३॥

परिभूएण वि दिअहं घरघरभमिरेण अण्णकज्जम्मि ।

चिरजीविएण इमिणा खविअ म्हो डड्डकाएण ॥१३४॥

वसइ जहिं चेअ खलो पोसिज्जंतो सिणेहदाणेहिं ।
तं चेअ आलअं दीवओ व्व अइरेण मइलेइ ॥१३५॥

होंती वि णिप्फल च्चिअ धणरिद्धी होइ किविणपुरिसस्स ।
गिम्हाअवसंतत्तस्स णिअअछाहि व्व पहिअस्स ॥१३६॥

फुरिए वामच्छि तए जइ एहिइ सो पिओ ज्ज ता सुइरं ।
सम्मीलिअ दाहिणअं तुइ अविअण्हं पुलोइस्सं ॥१३७॥

सुणहपउरम्मि गामे हिंडंती तुह कएण सा वाला ।
पासअसारि व्व घरंघरेण कइआ वि खज्जिहइ ॥१३८॥

अण्णण्णं कुसुमरसं जं किर सो महइ महुअरो पाउं ।
तं णीरसाण दोसो कुसुमाणं णेअ भमरस्स ॥१३९॥

रच्छापइण्णणअणुप्पला तुमं सा पडिच्छए एतं ।
दारणिहिएहि दोहि वि मंगलकलसेहि व थणेहिं ॥१४०॥

ता रुण्णं जा रुव्वइ ता झीणं जाव झिज्जए अंगं ।
ता णीससिअ वराईअ जाव सासा पहुप्पंति ॥१४१॥

समसोक्खदुक्खपरिवट्ठिआण कालेण रूढपेम्माण ।
मिहुणाण मरइ जं तं खु जिअइ इअरं मुअं होइ ॥१४२॥

हरिहिइ पिअस्स णवचूअपल्लवो पढममंजरिसणाहो ।
मा रुअसु पुत्ति पत्थाणकलसमुहसंठिओ गमणं ॥१४३॥

जो कह वि मह सहीहिं छिइं लहिऊण पेसिओ हिअए ।
सो माणो चोरिअकामुओ व्व दिट्ठे पिए णट्ठो ॥१४४॥

सहिआहि भण्णमाणा थणए लगं कुसुंभउप्फं ति ।
मुद्धवहुआ हसिज्जइ पप्फोडंती णहवआइं ॥१४५॥

उम्मूलेंति व हिअअं इमाइ रे तुह विरज्जमाणस्स ।
अवहीरणवसविस्वैटुलवलंतणअणद्धदिट्ठाइं ॥१४६॥

ण मुअंति दीहसासे ण रुअंति चिरं ण होंति किसिआओ ।
धण्णाउ ताउ जाणं बहुवल्लह वल्लहो ण तुमं ॥१४७॥

णिद्वालसपरिघुम्मिरंतसवलंतद्धतारआलोआ ।
कामस्स वि दुव्विसहा दिट्ठिणिवाआ ससिमुहीए ॥१४८॥

जीविअसेसाइ मए गमिआ कह कह वि पेम्मदुद्धोली ।
एण्हं विरमसु रे डड्ड हिअअ मा रज्जसु कहिं पि ॥१४९॥

अज्जाइ णवणहक्खअणिरिक्खणे गरुअजोव्वणुत्तुंगं ।
पडिमागअणिअणुप्पलच्चिअं होइ थणवट्ठं ॥१५०॥

तं णमह जस्स वच्चे लच्छिमुहं कोत्थुहम्मि संकंतं ।
दीसइ मअपरिहीणं ससिविवं सूरविंव व्व ॥१५१॥

मा कुण पडिवक्खसुहं अणुणेसु पिअं पसाअलोहिल्लं ।
अइगहिअगरुअमाणेण पुत्ति रासि व्व झिज्जिहिस्सि ॥१५२॥

विरहकरवत्तदूसह फालिज्जंतम्मि तीअ हिअअम्मि ।
अंसू कज्जलमइलं पमाणसुत्तं व पडिहाइ ॥१५३॥

दुण्णिक्खेवअम् एअं पुत्तअ मा साहसं करिज्जासु ।
एत्थ णिहिताइ मणे हिअआइ पुणो ण लब्भंति ॥१५४॥

णिव्वुत्तरआ वि वहू सुरअविरामट्ठिइं अआणंती ।
अविरअहिअआ अण्णं पि किं पि अत्थि त्ति चित्तेइ ॥१५५॥

णंदंतु सुरअसुहरसतण्हावहराइ सअललोअस्स ।
वहुकइअवमग्गविणिम्मिआइ वेसाण पेम्माइं ॥१५६॥

अप्पत्तमण्णदुक्खो किं मं किसिअ त्ति पुच्छसि हसंतो ।
पावसि जा चलचित्तं पिअं जणं ता तुह कहिस्सं ॥१५७॥

अवहत्थिऊण सहिजंपिआइ जाणं कएण रमिओ सि ।
एआइ ताइ सोक्खाइ संसओ जेहि जीअस्स ॥१५८॥

ईसालुओ पई से रत्तिं महुअं ण देइ उच्चेउं ।
उच्चेइ अप्पण च्चिअ माए अइउज्जुअसहाओ ॥१५९॥

अच्छोडिअवत्थद्धंतपत्थिए मंथरं तुमं वच्च ।
चित्तेसि थणहराआसिअस्स मज्झस्स वि ण भंगं ॥१६०॥

उद्धच्छो पिअइ जलं जह जह विरलंगुली चिरं पहिओ ।
पावालिआ वि तह तह धारं तणुअं पि तणुएइ ॥१६१॥

भिच्छअरो पेच्छइ णाहिमंडलं सा वि तस्स मुहअंदं ।
तं चट्ठुअं करंकं दोणह वि काआ विलुपंति ॥१६२॥

जेण विणा ण जिविज्जइ अणुणिज्जइ सो कआवराहो वि ।
पत्ते वि णअरडाहे भण कस्स ण वल्लहो अग्गी ॥१६३॥

वंकं को पुलइज्जउ कस्स कहिज्जउ सुहं व दुक्खं व ।
केण समं व हसिज्जउ पामरपउरे हअग्गामे ॥१६४॥

फलहीवाहणपुण्णाहमंगलं लंगले कुणंतीए ।
असईअ मणोरहगब्भिणीअ हत्था थरहरंति ॥१६५॥

पहिउल्लूरणसंकाउलाहि असईहि वहलतिमिरस्स ।
आइप्पणेण णिहुअं वडस्स सित्ताइ पत्ताई ॥१६६॥

भंजंतस्स वि तुह सग्गामिणो णइकरंजसाहाओ ।
पाआ अज्ज वि धम्मिअ तुह कह धरणिं चिअ छिवंति ॥१६७॥

अच्छउ दाव मणहरं पिआइ मुहदंसणं अइमहग्घं ।
तग्गामछेत्तसीमा वि झत्ति दिट्ठा सुहावेइ ॥१६८॥

णिकम्माहि वि छेत्ताहि पामरो णेअ वच्चाए वसहिं ।
मुअपिअजाआसुण्णइअगेहदुक्खं परिहरंतो ॥१६९॥

झंझावाउत्तिणघरविवरपलोदृतंसलिलधाराहिं ।
कुडुलिहिओहिदिअहं रक्खइ अज्जा करअलेहिं ॥१७०॥

गोलाणईअ कच्छे चक्खंतो राइआइ पत्ताई ।
उप्फडइ मक्कडो खोक्खेइ अ पोदं च पिट्ठेइ ॥१७१॥

गहवइणा मुअसेइहडुंडुमदामं चिरं वहेऊण ।
वग्गसआई णेऊण णवरि अज्जाहरे वद्धं ॥१७२॥

सिहिपेहुणावअंसा बहुआ वाहस्स गब्बिरी भमइ ।
गअमोत्तिअरइअपसाहणाण मज्झे सवत्तीण ॥१७३॥

वंकच्छिपेच्छिरीणं वंकुल्लविरीण वंकभमिरीणं ।
वंकहसिरीण पुत्तअ पुण्णेहि जणो पिओ होइ ॥१७४॥

भम धम्मिअ वीसद्धो सो सुणहो अज्ज मारिओ तेण ।
गोलाअडविअडकुडुंगवासिणा दरिअसीहेण ॥१७५॥

वाएरिएण भरिअं अच्छिं कण्णरइउप्पलरएण ।
फुक्कंतो अविअणं चुवंतो को सि देव्वाणं ॥१७६॥

सहि दुम्मंति कलंवाइं जह मं तह ण सेसकुसुमाइं ।
णूणं इमेसु दिअहेसु वहइ गुलिआधणुं कामो ॥१७७॥

णा ऽहं दूर्इ ण तुमं पिओ त्ति को अम्ह एत्थ वावारो ।
सा मरइ तुज्झ अअसो एअं धम्मक्खरं भणिमो ॥१७८॥

तीअ मुहाहि तुह मुहं तुज्झ मुहाओ अ मज्झ चलणम्मि ।
हत्थाहत्थीअ गओ अइदुक्करकारओ तिलओ ॥१७९॥

सामाइ सामलिज्जइ अद्धच्छिपलोइरीअ मुहसोहा ।
जंवूदलकअकण्णावअंसभमिरे हलिअउत्ते ॥१८०॥

दूइ तुमं चिअ कुसला कक्खडमउआइ जाणसे वोत्तुं ।
कडूइपंडरं जह ण होइ तह तं करेज्जासु ॥१८१॥

महिलासहस्सभरिए तुह हिअए सुहअ सा अमाअंती ।
दिअहं अणण्णकम्मा अंगं तणुअं पि तणुएइ ॥१८२॥

खणमेत्तं पि ण फिट्ठइ अणुदिअह विइण्णगरुअसंतावा ।
पच्छण्णपावसंक व्व सामली मज्झ हिअआओ ॥१८३॥

अण्णुअ णा ऽहं कुविआ उवऊहसु किं मुहा पसाएसि ।
तुह मण्णुसमुप्पाएण मज्झ माणेण वि ण कज्जं ॥१८४॥

दीहुण्हपउरणीसासपअविओ वाहसलिलपरिसित्तो ।
साहेइ सामसवलं व तीअ अहरो तुह विओए ॥१८५॥

सरए महद्दहाणं अंतोसिसिराइ वाहिरुण्हाइं ।

जाआइ कुविअसज्जणहिअअसरिच्छाइ सलिलाइं ॥१८६॥

आअस्स किं णु काहं किं वोच्छं कह णु होहिइ इमं ति ।
पढमुग्गअसाहसआरिआइ हिअअं थरहरेइ ॥१८७॥

णेउरकोडिविलगं चिउरं दइअस्स पाअपडिअस्स ।
हिअअं पउत्थमाणं उम्मोअंति च्चिअ कहेइ ॥१८८॥

तुज्झ ङगराअसेसेण सामली तह खरेण सोमारा ।
सा किर गोलातूहे ण्हाआ जंवूकसाएण ॥१८९॥

अज्जं चेअ पउत्थो अज्जं चिअ सुण्णआइ जाआइं ।
रच्छामुहदेउलचच्चराइ अम्हं च हिअआइं ॥१९०॥

चिरिडिं पि अआणंता लोआ लोएहि गोरवब्भहिआ ।
सोणारतुल व्व गिरक्खरा वि खंधेहि वुब्भंति ॥१९१॥

आअवंतकवोलं खलिअक्खरजंपिंरिं फुरंतोढिं ।
मा छिवसु त्ति सरोसं समोसरंति पिअं भरिमो ॥१९२॥

गोलाविसमोआरच्छलेण अप्पा उरम्मि से मुक्को ।
अणुअंपाणिद्वोसं तेण वि सा गाढम् उवऊः ॥१९३॥

सा तइ सहत्थदिण्णं अज्ज वि रे सुहअ गंधरहिअं पि ।
उव्वसिअणअरघरदेवअ व्व ओमालिअं वहइ ॥१९४॥

केलीअ वि रूसेउं ण तीरए तम्मि चुक्कविणअम्मि ।
जाइअएहि वि माए इमेहि अवसेहि अंगेहि ॥१९५॥

उप्फुल्लिआइ खेलउ मा णं वारेहि होउ परिखामा ।
मा जहणभारगरुई पुरिसाअंती किलिम्मिहइ ॥१९६॥

पउरजुआणो गामो महुमासो जोव्वणं पई ठेरो ।
जुण्णसुरा साहीणा असई मा होउ किं मरउ ॥१९७॥


वहुसो वि कहिज्जंतं तुह वअणं मज्झ हत्थसंदिट्ठं ।
ण सुअं ति जंपमाणा पुणरुत्तसअं कुणइ अज्जा ॥१९८॥

पाअडिअणेहसब्भावणिब्भरं तीअ जह तुमं दिट्ठो ।
संवरणवावडाए अण्णो वि जणो तह च्चेअ ॥१९९॥

गेण्हह पुलोअह इमं पहसिअवअणा पइस्स अप्पेइ ।
जाआ सुअपढमुब्भिण्णदंतजुअलंकिअं वोरं ॥२००॥



तृतीयशतकम्



अच्छउ ता जणवाओ हिअअं चिअ अत्तणो तुह पमाणं ।
तह तं सि मंदणेहो जह ण उवालंभजोग्गो सि ॥२०१॥

अप्पच्छंदपहाविर दुल्लहलंभं जणं विमग्गंत ।
आआसवहेहि भमतं हिअअ कइआ वि भज्जिहिसि ॥२०२॥

अहव गुण च्चिअ लहुआ अहवा गुणअण्णुओ ण सो लोओ ।
अहव म्हि णिग्गुणा वा बहुगुणवंतो जणो तस्स ॥२०३॥

फुट्ठंतेण वि हिअएण मामि कह णिव्वरिज्जए तम्मि ।
अद्दाए पडिविवं व्व जम्मि दुक्खं ण संकमइ ॥२०४॥

पासासंकी काओ णे ऽच्छइ दिण्णं पि पहिअघरिणीए ।
ओणत्तकरअलोअलिअवलअमज्झट्ठिअं पिंडं ॥२०५॥

ओहिदिअहागमासंकिरीहि सहिआहि कुट्ठुलिहिआओ ।
दो तिण्णि तर्हि मिअ चोरिआइ रेहा पुसिज्जंति ॥२०६॥

तुह मुहसारिच्छं ण लहइ त्ति संपुण्णमंडलो विहिणा ।
अण्णमअं व घडेउं पुणो वि खंडिज्जइ मिअंको ॥२०७॥

अज्जं गओ त्ति अज्जं गओ त्ति अज्जं गओ त्ति गणिरीए ।
पढम च्चिअ दिअहद्धे कुट्ठो रेहाहि चित्तलिओ ॥२०८॥

ण वि तह पढमसमागमसुरअसुहे पाविए वि परिओसो ।
जह वीअदिअहसविलक्खलक्खिए वअणकमलम्मि ॥२०९॥

जे समुहागअवोलंतवलिअपिअपेसिअच्छिविच्छोहा ।
अह मण्णे मअणसरा जणस्स जे होंति ते होंतु ॥२१०॥

इअरो जणो ण पावइ तुह जहणारुहणसंगमसुहेल्लिं ।
अणुहवइ कणअदोरो हुअवहवरुणाण माहप्पं ॥२११॥

जो जस्स विहवसारो तं सो देइ त्ति किं थ अच्छेरं ।
अणहोंतं पि हु दिण्णं दोहग्गं तइ सवत्तीणं ॥२१२॥

चंदसरिसं मुहं से सरसो अमअस्स मुहरसो तिस्सा ।
सकअग्गहरहसुज्जलचुंवणअं कस्स सरिसं से ॥२१३॥

उप्पण्णत्थे कज्जे अइचिंतंतो गुणागुणे तम्मि ।
चिरआलमंदपेच्छित्तणेण पुरिसो हणइ कज्जं ॥२१४॥

वालअ तुमाहि अहिअं णिअअं चिअ वल्लहं महं जीअं ।
तं तइ विणा ण होइ त्ति तेण कुविअं पसाएमि ॥२१५॥

पत्तिअ ण पत्तिअंती जइ तुज्झ इमे ण मज्झ रुइरीए ।
पुट्ठीअ वाहविदू पुलउब्भेए ण भिज्जंता ॥२१६॥

तं मित्तं काअव्वं जं किर वसणम्मि देसआलम्मि ।
आलिहिअभित्तिवाउल्लअ व्व ण परंमुहं ठाइ ॥२१७॥

वहुआइ णइणिउंजे पढमुग्गअसीलखंडणविलक्खं ।
उट्ठेइ विहंगउलं हाहा पक्खेहि व भणंतं ॥२१८॥

सच्चं भणामि वालअ ण त्थि असक्कं वसंतमासस्स ।
गंधेण कुरुवआणं मणं पि असइत्तनं ण गआ ॥२१९॥

एक्केक्कमवइवेढणविवरंतरदिण्णतरलणअणाए ।
तइ वोलंते वालअ पंजरसउणाइअं तीए ॥२२०॥

ता किं करेउ जइ तं सि तीअ वइवेढपेल्लिअथणीए ।
पाअंगुट्ठुगुक्खित्तणीसहंगीअ वि ण दिट्ठो ॥२२१॥

पिअसंभरणपलोट्टंतवाहधाराणिवाअभीआए ।
दिज्जइ वंकगीवाइ दीवओ पहिअजाआए ॥२२२॥

तइ वोलंते वालअ तिस्सा अंगाइ तह णु वलिआइं ।
जह पुट्ठिमज्झणिवडंतवाहधाराउ दीसंति ॥२२३॥

ता मज्झिमो च्चिअ वरं दुज्जणसुअणेहि दोहि वि ण कज्जं ।
जह दिट्ठो तवइ खलो तहेअ सुअणो अईसंतो ॥२२४॥

अद्धच्छिपेच्छिअं मा करेहि साहाविअं पलोएहि ।
सो वि सुदिट्ठो होहिइ तुमं पि मुद्धा कलिज्झिहिसि ॥२२५॥

दिअहं खुडुक्किआए तीए काऊण गेहवावारं ।
गरुए वि मण्णुदुक्खे भरिमो पाअंतसुत्तस्स ॥२२६॥

पाणउडीअ वि जलिऊण हुअवहो जलइ जण्णवाडम्मि ।
ण हु ते परिहरिअव्वा विसमदसासंठिआ पुरिसा ॥२२७॥

जं तुज्झ सई जाआ असईओ सुहअ जं च अम्हे वि ।
ता किं फुट्टउ वीअं तुज्झ समाणो जुआ ण त्थि ॥२२८॥

सव्वस्सम्मि वि डढे तह वि हु हिअअस्स णिव्वुइ च्चेअ ।
जं तेन गामडाहे हत्थाहत्थिं कुडो गहिओ ॥२२९॥

जाएज्ज वणुद्देसे खुज्जो वि हु णीसहो सिढिलवत्तो ।
मा माणुसम्मि लोए चाई रसिओ दरिदो अ ॥२३०॥

तस्स अ सोहग्गुणं अमहिलसरिसं च साहसं मज्झ ।
जाणइ गोलाऊरो वासारत्तद्धरत्तो अ ॥२३१॥

ते वोलिआ वअस्सा ताण कुडुंगाण खण्णुआ सेसा ।
अम्हे वि गअवआओ मूलुच्छेअं गअं पेम्मं ॥२३२॥

थणजहणणिअंवोवरि णहरंका गअवआण विलआणं ।
उव्वसिआणंगणिवासमूलवंध व्व दीसंति ॥२३३॥

जस्स जहिं चिअ पढमं तिस्सा अंगम्मि णिवडिआ दिट्ठी ।

तस्स तहिं चेअ ठिआ सव्वंगं केण वि ण दिट्ठं ॥२३४॥

विरहे विसं व विसमा अमअमआ होइ संगमे अहिअं ।
किं विहिणा समअं चिअ दोहिं पि पिआ विणिम्मविआ ॥२३५॥

अद्दसणेण पुत्तअ सुट्ठु वि णेहाणुवंधघडिआइं ।
हत्थउडपाणिआइ व कालेण गलति पेम्माइं ॥२३६॥

पइपुरओ च्चिअ णिज्जइ विंछुअडट्ठे ऽति जारवेज्जधरं ।
णिउणसहीकरधरिआ भुअजुअलंदोलिरी वाला ॥२३७॥

विक्किणइ माहमासंमि पामरो पारिडिं वइल्लेण ।
णिद्धूममुम्मुरे सामलीअ थणए णिअच्छंतो ॥२३८॥

सच्चं भणामि मरणे ठिअ म्हि पुण्णे तडम्मि तावीए ।
अज्ज वि तत्थ कुडुंगे णिवडइ दिट्ठी तह च्चेअ ॥२३९॥

अंधअरवोरपत्थिं व माउआ मह पइं विलुंपंति ।
ईसाअंति मह च्चिअ छेप्पाहिंतो फणो जाओ ॥२४०॥

अप्पत्तपत्तअं पाविऊण णवरंगअं हलिअसोणहा ।
उअह तणुई ण माअइ रुंदासु वि गामरच्छासु ॥२४१॥

वक्खेवआइ पिअजंपिआइ परहिअअणिवुइअराइ ।
विरलो हु जाणइ जणो उप्पण्णे जंपिअव्वाइं ॥२४२॥

छज्जइ पटुस्स ललिअं पिआइ माणो खमा समत्थस्स ।
जाणंतस्स अ भणिअं मोणं च अआणमाणस्स ॥२४३॥

वेविरसिण्णकरंगुलिपरिगगहक्खलिअलेगणीमगो ।
सोत्थि च्चिअ ण समप्पइ पिअसहि लेहम्मि किं लिहिमो ॥२४४॥

देव्वम्मि पराहुत्ते पत्तिअ घडिअं पि विहडइ णराणं ।
कज्जं वालुअवरणं व कह वि वंधं चिअ ण देइ ॥२४५॥

मामि हिअअं व पीअं तेण जुआणेण मज्जमाणाए ।
णहाणहलिद्दाकडुअं अणुसोत्त जलं पिअंतेण ॥२४६॥

जिविअं असासअं चिअ ण णिअत्तइ जोव्वणं अइक्कंतं ।
दिअहा दिअहेहि समा ण हेंति किं णिट्ठुरो लोओ ॥२४७॥

उप्पाइअदव्वाण वि खलाण को भाअणं खलो च्चेअ ।
पिक्काइ वि णिवफलाइ णवर काएहि खज्जंति ॥२४८॥

अज्ज मए गंतव्वं घणंधआरे वि तस्स सुहअस्स ।
अज्जा णिमीलिअच्छी पअपरिवाडिं घरे कुणइ ॥२४९॥

सुअणो ण कुप्पइ च्चिअ अह कुप्पइ विप्पिअं ण चिंतेइ ।
अह चिंतेइ ण जंपइ अह जंपइ लज्जिओ होइ ॥२५०॥

सो अत्थो जो हत्थे तं मित्तं जं णिरंतरं वसणे ।
तं रूअं जत्थ गुणा तं विण्णाणं जहिं धम्मो ॥२५१॥

चंदमुहि चंदधवला दीहा दीहच्छि तुह विओअम्मि ।
चउजामा सअजाम व्व जामिणी कह वि वोलीणा ॥२५२॥

अउलीणो दोमुहओ ता महुरो भोअणं मुहे जाव ।
मुरओ व्व खलो जिण्णम्मि भोअणे विरसम् आरसइ ॥२५३॥

तह सोण्हाइ पुलइओ दरवलिआवंगतारअं पहिओ ।
जह वारिओ वि घरसामिएण आलिंदए वसिओ ॥२५४॥

लहुअंति लहुं पुरिसं पव्वअमेत्तं पि दो वि कज्जाइं ।
णिव्वरणम् अणिव्वूढे णिव्वूढे जं अणिव्वरणं ॥२५५॥

कं तुंगथणुक्खित्तेण पुत्ति दारट्ठिआ पलोएसि ।
उण्णामिअकलसणिवेसिअग्घकमलेण व मुहेण ॥२५६॥

वइविवरणिग्गअदलो एरंडो साहइ व्व तरुणाणं ।
एत्थ घरे हलिअवहू एद्दहमेत्तत्थणी वसइ ॥२५७॥

गअकलहकुंभसंणिहघणपीणणिरंतरेहि तुंगेहिं ।
गूससिउं पि ण तीरइ किं पुण गंतुं हअथणेहिं ॥२५८॥

मासपसूअं छम्मासगब्भिणिं एक्कदिअहजरिअं च ।
रंगुत्तिणं च पिअं पुत्तअ कामंतओ होहि ॥२५९॥

पडिवक्खमण्णुपुंजे लावण्णउडे अणंगगअकुंभे ।
पुरिससअहिअअधरिए कीस थणंती थणे वहसि ॥२६०॥

घरिणीघणथणपेल्लणसुहेल्लिपडिअस्स होंतपहिअस्स ।
अवसउणंगारअवारविट्ठिदिअहा सुहावेंति ॥२६१॥

सा तुज्झ कए वालअ अणिसं घरदारतोरणणिसण्णा ।
ओसूसइ वंदणमालिअ व्व दिअहं चिअ वराई ॥२६२॥

हसिअं सहत्थतालं सुक्खवडं उवगएहि पहिएहिं ।
पत्तअफलाण सरिसे उट्ठीणे पूसविंदम्मि ॥२६३॥

अज्ज म्हि हासिआ मामि तेण पाएसु तह पडंतेण ।
तीए वि जलंतिं दीववत्तिम् अब्भुत्तअतीए ॥२६४॥

अणुवत्तणं कुणंतो वेसे वि जणे अहिण्णमुहराओ ।
अप्पवसो वि हु सुअणो परव्वसो आहिआईए ॥२६५॥

अणुदिअहवट्ठिआअर विण्णाणगुणेहि जणिअमाहप्पो ।
पुत्तअ अहिआअजणो विरज्जमाणो वि दुल्लक्खो ॥२६६॥

विण्णाणगुणमहग्घे पुरिसे वेसत्तणं पि रमणिज्जं ।
जणणिंदिए उण जणे पिअत्तणेणा ऽवि लज्झामो ॥२६७॥

कह णाम तीअ तह सो सहावगरुओ वि थणहरो पडिओ ।
अहवा महिलाण चिरं को वि ण हिअअम्मि संठाइ ॥२६८॥

सुअनु वअणं छिवंतं सूरं मा साउलीअ वारेहि ।
एअस्स पंकअस्स अ जाणउ कअरं सुहण्फंसं ॥२६९॥

माणोसहं व पिज्जइ पिआइ माणंसिणीअ दइअस्स ।
करसंपुडवलिउद्धाणणाइ मइराइ गंडूसो ॥२७०॥

कह सा णिव्वणिज्जउ जीअ जहालोइअम्मि अंगम्मि ।
दिट्ठी दुव्वलगाइ व्व पंकपडिआ ण उत्तरइ ॥२७१॥

कीरंति च्चिअ णासइ उअए रेह व्व खलअणे मेत्ती ।
सा उण सुअणम्मि कआ अणहा पाहाणरेह व्व ॥२७२॥

अव्वो उक्करआरअ पुणो वि तत्तिं करेसि गमणस्स ।
अज्ज वि ण होंति सरला वेणीअ तरंगिणो चिहुरा ॥२७३॥

ण वि तह छेअरआइ वि हरंति पुणरुत्तराअरसिआइं ।
जह जत्थ व तत्थ व जह व तह व सब्भावणेहरमिआइं ॥२७४॥

उज्झसि पिआइ समअं तह वि हु रे भणसु कीस किसिअ त्ति ।
उअरिभरेण अआणुअ मुअइ वइल्लो वि अंगाई ॥२७५॥

दढमूलवद्धगंठि व्व मोइआ कह वि तेण मे वाहू ।
अम्हेहि वि तस्स उरे खुत्त व्व समुक्खआ थणआ ॥२७६॥

अणुणअपसाइआए तुज्झ ऽवराहे चिरं गणंतीए ।
अपहुतोहअहत्थंगुरीअ रुणं वराईए ॥२७७॥

सेअच्छलेण पेच्छह तणुए अंगम्मि से अमाअंतं ।
लावणं ओसरइ व तिवलीसोवाणवंतीहिं ॥२७८॥

देव्वाअत्तम्मि फले किं कीरउ एत्तिअं पुणो भणिमो ।
कंकल्लिपल्लवाणं ण पल्लवा होंति सारिच्छा ॥२७९॥

धुअइ व्व मअकलंकं कवोलपडिअस्स माणिणी उअह ।
अणवरअवाहजलभरिअणअणकलसेहि चंदस्स ॥२८०॥

गंधेण अप्पणो मालिआण णोमालिआ ण फुट्ठिहइ ।
अण्णो को वि हआसाइ मंसलो परिमलुग्गारो ॥२८१॥

फलसंपत्तीअ समोणआइ तुंगाइ फलविपत्तीए ।
हिअआइ सुपुरिसाणं महातरूणं व सिहराईं ॥२८२॥

आसासेइ परिअणं परिवत्तंतीअ पहिअजाआए ।
णित्थामुव्वत्तणवलिअहत्थमुहलो वलअसद्धो ॥२८३॥

तुंगो च्चिअ होइ मणो मणंसिणो अंतिमासु वि दसासु ।
अत्थमणम्मि वि रइणो किरणा उद्धं चिअ फुरंति ॥२८४॥

पोट्टं भरंति सउणा वि माउआ अप्पणो अणुव्विग्गा ।
विहलुद्धरणसहावा हुवंति जइ के वि सप्पुरिसा ॥२८५॥

ण विणा सब्भावेणं घेप्पइ परमत्थजाणुओ लोओ ।

को जुणमंजरं कंजिएण वेआरिउं तरइ ॥२८६॥

रणाउ तणं रणाउ पाणिअं सव्वदो सअंगाहं ।
तह वि मआण मईण अ आमरणंताइ पेम्माइं ॥२८७॥

तावम् अवणेइ ण तहा चंदणपंको वि कामिमिहुणाणं ।
जह दूसहे वि गिम्हे अण्णोण्णालिंगणसुहेल्ली ॥२८८॥

तुप्पाणणा किणो अच्छसि त्ति परिपुच्छिआइ वहुआइ ।
विउणावेढिअजहणत्थलाइ लज्जोणअं हसिअं ॥२८९॥

हिअअ च्चेअ विलीणो ण साहिओ जाणिऊण घरसारं ।
बंधवदुव्वअणं मिव दोहलओ दुग्गअवहूए ॥२९०॥

धावइ विअलिअधम्मिल्लसिचअसंजमणवावडकरग्गा ।
चंडिलभअविवलाअंतडिंभपरिमग्गिणी घरिणी ॥२९१॥

जह जह उव्वहइ वहु णवजोव्वणमणहराइ अंगाइ ।
तह तह से तणुआइ मज्झो दइओ अ पडिवक्खो ॥२९२॥

जह जह जरापरिणओ होइ पई दुग्गओ विरूओ वि ।
कुलवालिआण तह तह अहिअअरं वल्लहो होइ ॥२९३॥

एसो मामि जुआणो वारं वारेण जं अडअणाओ ।
गिम्हे गामेक्कवडोदअं व किच्छेण पावंति ॥२९४॥

गामवडस्स पिउच्छा आवंडुमुहाण पंडुरच्छाहं ।
हिअएण समं असईण पडइ वाआहअं पत्तं ॥२९५॥

पेच्छइ अलद्धलक्खं दीहं णीससइ सुण्णअं हसइ ।
जह जंपइ अफुडत्थं तह से हिअअट्ठिअं किं पि ॥२९६॥

गहवइ गओ म्ह सरणं रक्खसु एअं ति अडअणा भणिउं ।
सहसागअस्स तुरिअं पइणो च्चिअ जारम् अप्पेइ ॥२९७॥


हिअएछिअस्स दिज्जउ तणुआअंतिं ण पेच्छह पिउच्छा ।
हिअएछिओ म्ह कत्तो भणिउं मोहं गआ कुअरी ॥२९८॥

खिण्णस्स उरे पइणो ठवेइ गिम्हावरणहरमिअस्स ।
ओल्लं गलंतकुसुमं ण्हाणसुअंधं चिहुरभारं ॥२९९॥

अह सरसदंतमंडलकवोलपडिमागओ मअच्छीए ।
अंतोसिंदूरिअसंखवत्तकरणिं वहइ चंदो ॥३००॥



चतुर्थशतकम्



अहं अम्ह आअओ अज्ज कुलहराओ त्ति छेँछई जारं ।
सहसागअस्स तुरिअं पइणो कंठम्मि लाएइ ॥३०१॥

पुसिआ कण्णाहरणेंदणीलकिरणाहआ ससिमऊहा ।
माणिणिवअणम्मि सकज्जलंसुसंकाइ दइएण ॥३०२॥

एद्धमेत्तम्मि जए सुंदरमहिलासहस्सभरिए वि ।
अणुहरइ णवर तिस्सा वामद्धं दाहिणद्धस्स ॥३०३॥

जह जह वाएइ पिओ तह तह णच्चांमि चंचले पेम्मे ।
वल्ली वलेइ अंगं सहावथद्धे वि रुक्खम्मि ॥३०४॥

दुक्खेहि लब्भइ पिओ लद्धो दुक्खेहि होइ साहीणो ।
लद्धो वि अलद्धो च्चिअ जइ जह हिअअं तह ण होइ ॥३०५॥

अव्वो अणुणअसुहकंखिरीअ अकअं कअं कुणंतीए ।
सरलसहावो वि पिओ अविणअमग्गं वला णीओ ॥३०६॥

हत्थेसु अ पाएसु अ अंगुलिगणणाइ अइगआ दिअहा ।
एण्हं उण केण गणिज्जउ त्ति भणिउं रुअइ मुद्धा ॥३०७॥

कीरमुहसच्छहेहिं रेहइ वसुहा पलासकुसुमेहिं ।
वुद्धस्स चलणवंदणपडिएहि व भिक्खुसंघेहिं ॥३०८॥

जं जं पिहुलं अंगं तं तं जाअं किसोअरि किसं ते ।
जं तं तणुअं तं तं पि णिट्ठिअं किं थ माणेण ॥३०९॥

ण गुणेण हीरइ जणो हीरइ जो जेण भाविओ तेण ।
मोत्तूण पुलिंदा मोत्तिआइ गुंजाउ गेण्हंति ॥३१०॥

लंकालआण पुत्तअ वसंतमासेक्कलद्धपसराण ।
आपीअलोहिआणं वीहेइ जणो पलासाणं ॥३११॥

घेत्तूण चुण्णमुट्ठिं हरिसूसुइआइ वेअमाणाए ।
भिसिणेमि त्ति पिअअमं हत्थे गंधोदअं जाअं ॥३१२॥

पुट्ठिं पुससु किसोअरि पलोहरंकोल्लपत्तचित्तलिअं ।
छेआहि दिअरजाआहि उज्जुए मा कलिज्जिहिसि ॥३१३॥

अच्छीइ ता थइस्सं दोहि वि हत्थेहि तम्मि दिट्ठम्मि ।
अंगं कलंवकुसुमं व पुलइअं कह णु ढक्किस्सं ॥३१४॥

झंझावाउत्तिणिए घरम्मि रोरुण णीसहणिसण्णं ।
दावेइ व गअवइअं विज्जुज्जोओ जलहराणं ॥३१५॥

भुंजसु जं साहीणं कत्तो लोणं कुगामरिद्धम्मि ।
सुहअ सलोणेण वि किं तेण सिणेहो जहिं णत्थि ॥३१६॥

सुहपुच्छिआइ हलिओ मुहपंकअसुरहिपवणिव्विविअं ।
तह पिअइ पअइकडुअं पि ओसहं जह ण णिट्ठाइ ॥३१७॥

अह सा तहिं तहिं व्विअ वाणीरवणम्मि चुवकसंकेआ ।
तुह दंसणं विमग्गइ पब्भट्टणिहाणठाणं च ॥३१८॥

दढरोसकलुसिअस्स वि सुअणस्स मुहाहि विप्पिअं कंतो ।
राहुमुहम्मि वि ससिणो किरणा अमअं विअ मुअंति ॥३१९॥

अवमानिओ वि ण तहा दुम्मिज्जइ सज्जणो विहवहीणो ।
पडिकाउं असमत्थो माणिज्जंतो जह परेण ॥३२०॥

कलहंतरे वि अविणिग्गआइ हिअअम्मि जरमुवगाअं ।
सुअणकआइ रहस्साइ डहइ आउक्खए अग्गी ॥३२१॥

लुम्बीओ अंगणमाहवीण दारगलाउ जाआउ ।
आसासो पंथपलोअणे वि पिट्ठो गअवईणं ॥३२२॥

पिअदंसणसुहरसमउलिआइ जइ से ण होंति णअणाइ ।
ता केण कण्णरइअं लक्खिज्जइ कुवलअं तिस्सा ॥३२३॥

चिक्खिल्लखुत्तहलमुहकट्ठणसिद्धिले पइम्मि पासुते ।
अप्पत्तमोहणसुहा घणसमअं पामरी सवइ ॥३२४॥

दुम्मेति देंति सोक्खं कुणंति अणुराअं रमावेंति ।
अरइरइवंधवाणं णमो णमो मअणवाणाणं ॥३२५॥

कुसुममआ वि अइखरा अलद्धफंसा वि दूसहपआवा ।
भिंदता वि रइअरा कामस्स सरा बहुविअप्पा ॥३२६॥

ईसं जणेंति दावेंति मम्महं विप्पिअं सहावेंति ।
विरहे ण देंति मरिउं अहो गुणा तस्स बहुमग्गा ॥३२७॥

णीआइ अज्ज णिक्किव पिणद्धणवरंगआइ वरईए ।
घरपरिवाडीअ पहेणआइ तुह दंसणासाए ॥३२८॥

सूइज्जइ हेमंतम्मि दुग्गओ फुंफुआसुअंधेण ।
धूमकविलेण परिविरलतंतुणा जुण्णपडएण ॥३२९॥

खरसिप्पीरुल्लिहिआइ कुणइ पहिओ हिमागमपहाए ।
आअमणजलोल्लिअहत्थफंसमसिणाइ अंगाइ ॥३३०॥

णक्खुक्खुडिअं सहआरमंजरिं पामरस्स सीसम्मि ।
वंदिं मिव हीरंतिं भमरजुआणा अणुसरंति ॥३३१॥

सूरच्छलेण पुत्तअ कस्स तुमं अंजलिं पणामेसि ।
हासकडक्खुम्मिस्सा ण होति देवाण जोक्कारा ॥३३२॥

मुहविज्झाविअपईवं णिरुद्धसासं ससंकिउल्लावं ।
सवहसअरक्खिओट्टं चोरिरअमिअं सुहावेइ ॥३३३॥

गेअच्छलेण भरिउं कस्स तुमं रुअसि णिब्भरुक्कंठं ।

मण्णुपडिरुद्धकंठद्धणिंतखलिअक्खरुल्लावं ॥३३४॥

वहलतमाहअराई अज्ज पउत्थो पई घरं सुण्णं ।
तह जग्गेसु सअज्जिअ ण जहा अम्हे मुसिज्जामो ॥३३५॥

संजीवणोसहं मिव सुअस्स रक्खइ अणणवावारा ।
सासू णवब्भदंसणकंठागअजीविअं सोणहं ॥३३६॥

णूणं हिअअणिहिताइ वससि जाआइ अम्ह हिअअम्मि ।
अण्णह मणोरहा मे साहसु कह तीअ विण्णाआ ॥३३७॥

तइ सुहअ अईसंते तिस्सा अच्छीहि कण्णलग्गेहिं ।
दिण्णं घोलिरवाहेहि पाणिअं दंसणसुहाणं ॥३३८॥

उप्पेक्खागअ तुह मुहदंसणपडिरुद्धजीविआसाइ ।
दुहिआइ मए कालो केत्तिअमेत्तो व्व णेअव्वो ॥३३९॥

वोलीणालक्खिअरूअजोव्वणा पुत्ति कं ण दूमेसि ।
दिट्ठा पणट्ठपोराणजणवआ जम्मभूमि व्व ॥३४०॥

परिओसविअसिएहिं भणिअं अच्छीहि तेण जणमज्झे ।
पडिवण्णं तीअ वि उव्वमंतसेएहि अंगेहिं ॥३४१॥

एक्कक्कमसंदेसाणुराअवट्ठंतकोउहल्लाई ।
दुक्खं असमत्तमणोरहाइ अच्छंति मिहुणाई ॥३४२॥

जइ सो ण वल्लहो च्चिअ गोत्तग्गहणेण तस्स सहि कीस ।
होइ मुहं ते रविअरफंसविसट्ठं व तामरसं ॥३४३॥

माणदुमपरुसपवणस्स मामि सव्वंगणिवुडुअरस्स ।
अवऊहणस्स भदं रइणाडअपुव्वरंगस्स ॥३४४॥

णिअआणुमाणणीसंक हिअअ दे पसिअ विरम एत्ताहे ।
अमुणिअपरमत्थजणाणुलग्ग कीस म्ह लहुएसि ॥३४५॥

ओसहिअजणो पइणा सलाहमाणेण अइचिरं हसिओ ।
चंदो त्ति तुज्झ वअणे विइण्णकुसुमंजलिविलक्खो ॥३४६॥

झिज्जंतोहि अणुदिणं पच्चक्खम्मि वि तुमम्मि अंगेहिं ।
वालअ पुच्छिज्जंती ण आणिमो कस्स किं भणिमो ॥३४७॥

अंगाणं तणुआरअ सिक्खावअ दीहरोइअव्वाणं ।
विणआइक्कमआरअ मा मा णं पम्हसिज्जासु ॥३४८॥

अण्णह ण तीरइ च्चिअ परिवट्ठंतगरुअं पिअअमस्स ।
मरणविणोएण विणा विरमावेउं विरहदुक्खं ॥३४९॥

वण्णंतीहि तुह गुणे बहुसो अम्हेहि छिंछईपुरओ ।
वालअ सअम् एअ कओ सि दुल्लहो कस्स कुप्पामो ॥३५०॥

जाओ सो वि विलक्खो मए वि हसिरुण गाढम् उवऊढो ।
पढमोसरिअस्स णिअंसणस्स गंठिं विमगंतो ॥३५१॥

कंडुज्जुआ वराई अज्ज तए सा कआवराहेण ।
अलसाइअरुण्णविअंभिआइ दिअहेण सिक्खविआ ॥३५२॥

अवराहेहि वि ण तहा पत्तिअ जह मं इमेहि दुम्मेसि ।
अवहत्थिअसब्भावेहि सुहअ दक्खिण्णभणिएहिं ॥३५३॥

मा जूर पिआलिंणसरहसभमिरीण वाहुलइआणं ।
तुण्हिक्क परुण्णेनं इमिणा माणंसिणि मुहेणं ॥३५४॥

मा वच्च पुप्फलाविर देवा उअअंजलीहि तूसंति ।
गोलाणईअ पुत्तअ सीलुम्मूलाइ कूलाइं ॥३५५॥

वअणे वअणम्मि चलंतसीससुण्णावहाणहुंकारं ।
सहि देंती णीसासंतरेसु कीस म्ह दूमेसि ॥३५६॥

सब्भावं पुच्छंती वालअ रोआविआ तुह पिआए ।
ण त्थि च्चिअ कअसवहं हासुम्मिस्सं भणंतीए ॥३५७॥

एत्थ मए रमिअवं तीअ समं चिंतिऊण हिअएण ।
पामरकरसेउल्ला णिवडइ तुवरी वविज्जंती ॥३५८॥

गहवइसुओच्चिएसु वि फलहीवेंटेसु उअह वहुआइ ।
मोहं भमइ पुलइओ विलग्गसेअंगुली हत्थो ॥३५९॥

अज्जं मोहणसुहिअं मुअ त्ति मोत्तुं पलाइए हलिए ।
दरफुडिअवेंटभारोणआइ हसिअं व फलहीए ॥३६०॥

णीसासुक्कंपिअपुलइएहि जाणांति णच्चिउं धण्णा ।
अम्हारिसीहि दिट्ठे पिअम्मि अप्पा वि वीसरिओ ॥३६१॥

तणुएण वि तणुइज्जइ खीणेण वि खिज्जए वला इमिणा ।
मज्झत्थेण वि मज्झेण पुत्ति कह तुज्झ पडिवक्खो ॥३६२॥

वाहि व्व वेज्जरहिओ धणरहिओ सअणमज्झवासो व्व ।
रिउरिद्धिदंसणं मिव दूसहणीओ तुह विओओ ॥३६३॥

को त्थ जअम्मि समत्थो थइउं वित्थिण्णणिम्मलुत्तुंगं ।
हिअअं तुज्झ णराहिव गअणं व पओहरे मोत्तुं ॥३६४॥

आअण्णेइ अडअणा कुडुंगहेट्ठम्मि दिण्णसंकेआ ।
अग्गपअपेल्लिआणं मम्मरअं जुण्णपत्ताणं ॥३६५॥

अहिलेंति सुरहिणीससिअपरिमलावद्धमंडलं भमरा ।
अमुणिअचंदपरिहवं अपुव्वकमलं मुहं तिस्सा ॥३६६॥

धीरावलंविरीअ वि गुरुअणपुरओ तुमम्मि वोलीणे ।
पडिओ से अच्छिणिमीलणेण पम्हट्ठिओ वाहो ॥३६७॥

भरिमो से सअणपरंमुहीअ विअलंतमाणपसराइ ।
कइअवसुत्तुवत्तणथणअलसप्पेल्लणसुहेल्लिं ॥३६८॥

फगुच्छवणिद्दोसं केण वि कद्दमपसाहणं दिण्णं ।
थणअलसमुहपलोद्वृतसेअधोअं किणो धुअसि ॥३६९॥

किं ण भणिओ सि वालअ गामणिधूआइ गुरुअणसमक्खं ।
अणिमिसम् ईसीसि वलंतवअणणअणद्धतिद्वहिं ॥३७०॥

णअणब्भंतरघोलंतवाहभरमंथराइ दिट्ठीए ।
पुणरुत्तपेच्छरीए वालअ किं जं ण भणिओ सि ॥३७१॥

जो सीसम्मि विइण्णो मज्झ जुआणेहि गणवई आसि ।
तं चिअ एण्हं पणमामि हअजरे होहि संतुट्ठा ॥३७२॥

अंतोहुत्तं डज्झइ जाआसुणो घरे हलिअत्तो ।
उक्खाअणिहाणाइ व रमिअट्ठाणाइ पेच्छंतो ॥३७३॥

णिद्वाभंगो आवंडुरत्तणं दीहरा अ णीसासा ।
जाअंति जस्स विरहे तेण समं कीरिसो माणो ॥३७४॥

तेण ण मरामि मण्णूहि पूरिआ अज्ज जेण रे सुहअ ।
तग्गअमणा मरंती मा तुज्झ पुणो वि लग्गिस्सं ॥३७५॥

अवरज्झसु वीसद्धं सव्वं ते सुहअ विसहिमो अम्हे ।
गुणणिब्भरम्मि हिअए पत्तिअ दोसा ण माअंति ॥३७६॥

भरिउच्चरंतपसरिअपिअसंभरणपिसुणो वराईए ।
परिवाहो विअ दुक्खस्स वहइ णअणट्ठिओ वाहो ॥३७७॥

जं जं करेसि जं जं जंपसि जह जह तुमं णिअच्छेसि ।
तं तम् अणुसिक्खरीए दीहो दिअहो ण संपडइ ॥३७८॥

भंडंतीअ तणाइं सोत्तुं दिण्णाइ जाइ पहिअस्स ।
ताइ च्चेअ पहाए अज्जा आअट्ठइ रुअंती ॥३७९॥

वसणम्मि अणुव्विग्गा विहवम्मि अगव्विआ भए धीरा ।
होति अहिण्णसहावा समेसु विसमेसु सप्पुरिसा ॥३८०॥

अज्ज सहि केण गोसे कं पि मणे वल्लहं भरंतेण ।
अम्हं मअणसराहअहिअअवणप्फोडणं गीअं ॥३८१॥

उट्ठंतमहारंभे थणए दट्ठण मुद्धवहुआए ।
ओसण्णकवोलाए णीसिसिअं पढमघरिणीए ॥३८२॥

गरुअल्लुहाउलिअस्स वि वल्लहकरिणीमुहं भरंतस्स ।
सरसो मुणालकवलो गअस्स हत्थे च्चिअ मिलाणो ॥३८३॥

पसिअ पिए का कुविआ सुअणु तुमं परअणम्मि को कोवो ।
को हु परो णाह तुमं कीस अउण्णाण मे सत्ती ॥३८४॥

एहिसि तुमं ति णिमिसं व जग्गिअं जामिणीअ पढमद्धं ।
सेसं संतावपरव्वसाइ वरिसं व वोलीणं ॥३८५॥

अवलंवह मा संकह ण इमा गहलंधिआ परिब्भमइ ।

अत्थक्कगज्जिउब्भंतहिथहिअआ पहिअजाआ ॥३८६॥

केसररअविच्छट्ठे मअरंदो होइ जेत्तिओ कमले ।
जइ भमर तेत्तिओ अण्णहिं पि ता सोहसि भमतो ॥३८७॥

पेच्छंति अणिमिसच्छा पहिआ हलिअस्स पिट्ठपंडुरिअं ।
धूअं दुद्धसमुद्दुत्तरंतलच्छिं विअ सअण्हा ॥३८८॥

कस्स भरसि त्ति भणिए को मे अत्थि त्ति जंपमाणीए ।
उव्विग्गरोइरीए अम्हे वि रुआविआ तीए ॥३८९॥

पाअपडिअं अहव्वे किं दाणि ण उट्ठवेसि भत्तारं ।
एअं चिअ अवसाणं दूरं पि गअस्स पेम्मस्स ॥३९०॥

तडविणिहिअग्गहत्था वारितरंगेहि घोलिरणिअंवा ।
सालूरी पडिविवे पुरिसाअंति व्व पडिहाइ ॥३९१॥

सिक्करिअमणिअमुहवेविआइ धुअहत्थसिंजिअव्वाइ ।
सिक्खंतु वोडहीओ कुसुंभ तुम्हं पसाएण ॥३९२॥

जेत्तिअमेत्ता रच्छा णिअंव कह तेत्तिओ ण जाओ सि ।
जेण छिविज्जइ गुरुअणलज्जोसरिओ वि सो सुहओ ॥३९३॥

मरगअसूईविद्धं व मोत्तिअं पिअइ आअअग्गीवो ।
मोरो पाउसआले तणग्गलगं उअअविंदुं ॥३९४॥

अज्जाइ णीलकंचुअभरिउव्वरिअं विहाइ थणवट्ठं ।
जलभरिअजलहरंतरदरुग्गअं चंदविवं व ॥३९५॥

राअविरुद्धं व कहं पहिओ पहिअस्स साहइ ससकं ।
जत्तो अम्वाण दलं तत्तो दरणिग्गअं किं पि ॥३९६॥


धण्णा ता महिलाओ जा दइअं सिविणए वि पेच्छंति ।
णिद्धं च्चिअ तेण विणा ण एइ का पेच्छए सिविणं ॥३९७॥

परिहरिअकणअकुंडलगंडत्थलमणहरेसु सवणेसु ।
अण्णुअ समअवसेणं परिहिज्जइ तालवेट्ठजुअं ॥३९८॥

मज्झण्हपत्थिअस्स वि गिम्हे पहिअस्स हरइ संतावं ।
हिअअट्ठिअजाआमुहमअंकजोणहाजलप्पवहो ॥३९९॥

भण को ण रूसइ जणो पत्थिज्जंतो अदेसआलम्मि ।
रइवावडा रुवंतं पिअं पि पुत्तं सवइ माआ ॥४००॥





डङ्गसि डङ्गसु कुत्थसि कुत्थसु अह फुडसि हिअअ ता फुडसु ।
तह वि परिसेसिओ च्चिअ सो खु मए गलिससब्भावो ॥४०१॥

दट्ठण रंदतुंडगणिगगं णिअसुअस्स दाढगं ।
भौडी विणा वि कज्जेण गामणिअडे जवे चरइ ॥४०२॥

हेलाकरगगकट्ठिअजलरिक्कं साअरं पआसंतो ।
जअइ अणिगहवडवग्गिभरिअगअणो गणाहिर्व ॥४०३॥

एएण च्चिअ कंकेल्लि तुज्झ तं ण त्थि जं ण पज्जत्तं ।
उवमिज्जइ जं तुह पल्लवेण वरकामिणीहत्थो ॥४०४॥

रसिअ विअट्ठ विलासिअ समअण्णुअ सच्चअं असोओ सि ।
वरजुवइचलणकमलाहओ वि जं विअससि सअण्हं ॥४०५॥

वल्लिणो वाआवहे चोज्जं णिउणत्तणं च पअडंतो ।
सुरसत्थकआणंदो वामणरूवो हरी जअइ ॥४०६॥

विज्झाविज्जइ जलणो गहवइधूआइ वित्थअसिहो वि ।
अणुमरणघणालिगणपिअअमसुहसिज्जिरंगीए ॥४०७॥

जारमसाणसमुब्भवभूइसुहफंससिज्जिरंगीए ।
ण समप्पइ णवकावालिणीअ उदूलणारंभो ॥४०८॥

एक्को पण्हअइ थणो वीओ पुलएइ णहमुहालिहिओ ।
पुत्तस्स पिअअमस्स अ मज्झणिसण्णाइ घरिणीअ ॥४०९॥

एत्ताइ च्चिअ मोहं जणेइ वालत्तणे वि वट्ठंती ।
गामणिधुआ विसलअ व्व वट्ठिआ काहिइ अणत्थं ॥४१०॥

अपहुप्पंतं महिमंडलम्मि णहसंठिअं चिरं हरिणो ।
ताराउप्फप्पअरंचिअं व तइअं पअं णमह ॥४११॥

सुप्पउ तइओ वि गओ जामो त्ति सहीउ कीस मं भणह ।
सेहालिआण गंधो ण देइ सोत्तुं सुअह तुम्हे ॥४१२॥

कह सो ण संभरिज्जइ जो मे तह संठिआइ अंगाई ।
णिव्वत्तिए वि सुरए णिज्झाअइ सुरअरसिओ व्व ॥४१३॥

सुक्खंतवहलकद्दमधम्मविसूरंतकमढपाढीणं ।
दिट्ठं अइट्ठुअं कालेण तलं तडाअस्स ॥४१४॥

चोरिअरअसद्दालुणि मा पुत्ति भम्मसु अंधआरम्मि ।
अहिअअरं लक्खिज्जसि तमभरिए दीवअसिह व्व ॥४१५॥

वाहिता पडिवअणं ण देइ रूसेइ एक्कमेक्कस्स ।
असई कज्जेण विणा पलिप्पमाणे णईकच्छे ॥४१६॥

आम असइ म्ह ओसर पइवए ण तुह मइलिअं गोत्तं ।
किं उण जणस्स जाअ व्व चंडिलं ता ण कामेमो ॥४१७॥

णिद्धं लहंति कहिअं सुणांति खलिअक्खरं ण जंपंति ।
जाहि ण दिट्ठो सि तुमं ताओ च्चिअ सुहअ सुहिआओ ॥४१८॥

वालअ तुमाइ दिण्णं कण्णे काऊण वोरसंघाडिं ।
लज्जालुइणी वि व्हू घरं गआ गामरच्छाए ॥४१९॥

अह सो विलक्खहिअओ मए अहव्वाइ अगहिआणुणओ ।
परवज्जणच्चिरीहिं तुम्हेहि उवेक्खिओ णित्तो ॥४२०॥

दीसंतो णअणसुहो णिव्वुदिजणणो करेहि वि छिवंतो ।
अब्भत्थिओ ण लब्भइ चंदो व्व पिओ कलाणिलओ ॥४२१॥

जे लीणभमरभरभग्गोच्छआ आसि णइअडुच्छंगे ।
कालेण वंजुला पिअवअस्स ते खण्णुआ जाआ ॥४२२॥

खणभंगुरेण पेम्मेण माउआ दूमिअ म्हि एत्ताहे ।
सिविणअणिहिलंभेण व दिट्ठपणट्ठेण लोअम्मि ॥४२३॥

चाओ सहावसरलं विच्छुहइ सरं गुणम्मि णिवडंतं ।
वंकस्स उज्जुअस्स अ संवंधो किं चिरं होइ ॥४२४॥

पढमं वामणविहिणा पच्छा हु कओ विअंभमाणेण ।
थणजुअलेण इमीए महमहणेण व्व वलिवंधो ॥४२५॥

मालइकुसुमाइ कुलुंचिऊण मा जाण णिव्वुओ सिसिरो ।
काअव्वा अज्ज वि णिग्गुणाण कुदाण सामिद्धी ॥४२६॥

तुंगाण विसेसणिरंतराण सरसवणलद्धसोहाणं ।
कअकज्जाण भडाण व थणाण पडणं पि रमणिज्जं ॥४२७॥

परिमलणसुहा गरुआ अलद्धविवरा सलक्खणाहरणा ।
थणआ कव्वालाअ व्व कस्स हिअए ण लगंति ॥४२८॥

खिप्पइ हारो थणमंडलाहि तरुणीहि रमणपरिरंभे ।
अच्चिअगुणा वि गुणिणो लहंति लहुअत्तणं काले ॥४२९॥

अण्णो को वि सहावो वम्महसिहिणो हला हआसस्स ।
विज्झाइ णीरसाणं हिअए सरसाण पज्जलइ ॥४३०॥

तह तस्स माणपरिवट्ठिअस्स चिरपणअवद्धमूलस्स ।
मामि पडंतस्स सुओ सद्दो वि ण पेम्मरुक्खस्स ॥४३१॥

पाअपडिओ ण गणिओ पिअं भणंतो वि अप्पिअं भणिओ ।
वच्चंतो वि ण रुद्धो भण कस्स कए कओ माणो ॥४३२॥

पुसइ खणं धुअइ खणं पप्फोडइ तक्खणं अआणंती ।
मुद्धवहू थणवट्ठे दिण्णं दइएण णक्खवअं ॥४३३॥

वासारत्ते उण्णअपओहरे जोव्वणे व्व वोलीणे ।

पढमेक्ककासकुसुमं दीसइ पलिअं व धरणीए ॥४३४॥

कत्थ गअं रइविं कत्थ पणट्ठाउ चंदताराउ ।
गअणे वलाअवंतिं कालो होरं व कट्टेइ ॥४३५॥

अविरलपडंतणवजलधारारज्जुघडिअं पअत्तेण ।
अपहुत्तो उक्खिविउं रसइ व मेहो महिं उअह ॥४३६॥

ओ हिअअ ओहिदिअहं तइआ पडिवज्जिऊण दइअस्स ।
अत्थक्काउल वीसंभघाइ किं तइ समाढत्तं ॥४३७॥

जो वि ण आणइ तस्स वि कहेइ भग्गाइ तेण वलआइं ।
अइउज्जुआ वराई अहव पिओ से हआसाए ॥४३८॥

सामाइ गरुअजोव्वणविसेसभरिए कवोलमूलम्मि ।
पिज्जइ अहोमुहेण व कण्णवअंसेण लावणं ॥४३९॥

सेउल्लिअसव्वंगी गोत्तग्गहणेण तस्स सुहअस्स ।
दूई अप्पाहेत्ती तस्सेअ घरंगणं पत्ता ॥४४०॥

जम्मंतरे वि चलणे जीएणं मअण तुज्झ अच्चिस्सं ।
जइ तं पि तेण वाणेण विज्झसे जेण हं विद्धा ॥४४१॥

णिअवक्खारोविअदेहभारणिउणं रसं लहंतेण ।
विअसाविऊण पिज्जइ मालइकलिआ महुअरेण ॥४४२॥

कुरुणाहो विअ पहिओ दुम्मिज्जइ माहवस्स मिलिएण ।
भीमेण जहिच्छाए दाहिणवाएण छिप्पंतो ॥४४३॥

जाव ण कोसविआसं पावइ ईसीसि मालईकलिआ ।
मअरंदपाणलोहिल्ल भमर ताव च्चिअ मलेसि ॥४४४॥

अकअण्णुअ तुज्झ कए पाउसराईसु जं मए खुण्णं ।
उप्पेक्खामि अलज्जिर अज्ज वि तं गामचिक्खिल्लं ॥४४५॥

रेहइ गलंतकेसक्खलंतकुंडलललंतहारलआ ।
अद्दुप्पइआ विज्जाहरि व्व पुरिसाइरी वाला ॥४४६॥

जइ भमसि भमसु एमेअ कण्ह सोहग्गगव्विरो गोठे ।
महिलाणं दोसगुणे विआरिउं जइ खमो सि तुमं ॥४४७॥

संझासमए जलपूरिअंजलिं विहडिएक्कवामअरं ।
गोरीअ कोसपाणुज्जअं व पमहाहिवं णमह ॥४४८॥

गामणिणो सव्वासु वि पिआसु अणुमरणगहिअवेसासु ।
मम्मच्छेएसु वि वल्लहाइ उवरि वलइ दिट्ठी ॥४४९॥

मामि सरिसक्खराण वि अत्थि विसेसो पअंपिअव्वाणं ।
णेहमइआणम् अण्णो अण्णो उवरोहमइआणं ॥४५०॥

हिअआहिंतो पसरंति जाइ अण्णाइ ताइ वअणाइ ।
ओसरसु किं इमेहिं अहरंतरमेत्तभणिएहिं ॥४५१॥

कह सा सोहग्गुणं मए समं वहइ णिग्घिण तुमम्मि ।
जीअ हरिज्जइ णामं हरिरुण अ दिज्जए मज्झ ॥४५२॥

सहि साहसु सब्भावेण पुच्छिमो किं असेसमहिलाणं ।
वह्वंति करत्थ च्चिअ वलआ दइए पउत्थम्मि ॥४५३॥

भमइ परिदो विसूरइ उक्खिविउं से करं पसारेइ ।
करिणो पंकक्खुत्तस्स णेहणिअलाविआ करिणी ॥४५४॥

रइकेलिहिअणिअंसणकरकिसलअरुद्धणअणजुअलस्स ।
रुद्धस्स तइअणअणं पव्वइपरिउंविअं जअइ ॥४५५॥

धावइ पुरओ पासेसु भमइ दिट्ठीपहम्मि संठाइ ।
णवलइकरस्स तुह हलिअउत्त दे पहरसु वराइं ॥४५६॥

कारिमम् आणंदवडं भामिज्जंतं वहूअ सहिआहिं ।
पेच्छइ कुमारिजारो हासुम्मीसेहि अच्छीहिं ॥४५७॥

सणिअं सणिअं ललिअंगुलीअ मअणवडलाअणणिहेण ।
वंधइ धवलव्वणवट्टअं व वणिआहरे तरुणी ॥४५८॥

रइविरमलज्जिआओ अप्पत्तणिअंसणाउ सहस त्ति ।
ढक्कंति पिअअमालिगणेण जहणं कुलवहूओ ॥४५९॥

पाअडिअं सोहग्गं तंवाए उअह गोट्टमज्झम्मि ।
दुट्ठवुसहस्स सिंगे अच्छिउडं कंडुअंतीए ॥४६०॥

उअ संभमविक्खित्तं रमिअव्वअलंपडाइ असईए ।
णवरंगअं कुडंगे धअं व दिण्णं अविणअस्स ॥४६१॥

हत्थप्फंसेण जरग्गवी वि पण्हअइ दोहअगुणेण ।
अवलोइअपण्हइरिं पुत्तअ पुण्णेहि पाविहिसि ॥४६२॥

मसिणं चंकम्मंती पए पए कुणइ कीस मुहभंगं ।
णूणं से मेहलिआ जहणगअं छिवइ णहर्वति ॥४६३॥

संवाहणसुहरसतोसिएण देंतेण तुह करे लक्खं ।
चलणेण विक्कमाइच्चचरिअम् अनुसिक्खिअं तिस्सा ॥४६४॥

पाअपडणाण मुद्धे रहसवलामोडिचुंविअव्वाणं ।
दंसणमेत्तपसण्णे चुक्का सि सुहाण वहुआणं ॥४६५॥

दे सुअणु पसिअ एण्हिं पुणो वि सुलहाइ रूसिअव्वाइं ।
एसा मअच्छि मअलंछणुज्जला गलइ छणराइं ॥४६६॥

आवण्णाइ कुलाइं दो च्चिअ जाणंति उण्णइं णेउं ।
गोरीअ हिअअदइओ अहवा सालाहणणरिंदो ॥४६७॥

णिक्खंधदुरारोहं पुत्तअ मा पाडलिं समारुहसु ।
आरूढणिवडिआ के इमीअ ण कआ हआसाए ॥४६८॥

गामणिघरम्मि अत्ता एक्क च्चिअ पाडला इहगामे ।
वहुपाडलं च सीसं दिअरस्स ण सुंदरं एअं ॥४६९॥

अण्णाण वि होंति मुहे पम्हलधवलाइ दीहकसणाइ ।
णअणाइ सुंदरीणं तह वि हु दडुं ण आणंति ॥४७०॥

हंसेहि व तुह रणजलअसमअभअचलिअविहलवक्खेहिं ।
परिसेसिअपोम्मासेहि माणसं गम्मइ रिऊहिं ॥४७१॥

दुग्गअघरम्मि घरिणी रक्खंती आउलत्तणं पइणो ।
पुच्छिअदीहलसद्धा पुणो वि उअअं चिअ कहेइ ॥४७२॥

आअंवल्लोअणाणं ओल्लंसुअपाअडोरुजहणाणं ।
अवरणहमज्जिरीणं कएण कामो वहइ चावं ॥४७३॥

के उव्वरिआ के इह ण खंडिआ के ण लुत्तगुरुविहवा ।
णहराइ वेसिणीओ गणणारेहाउ व वहंति ॥४७४॥

विरहेण मंदरेण व हिअअं दुद्धोअहिं व महिऊण ।
उम्मूलिआइ अव्वो अम्हं रअणाइ व सुहाइ ॥४७५॥

उज्जुअरए ण तूसइ वंकम्मि वि आअमं विअप्पेइ ।
एत्थ अहव्वाइ मए पिए पिअं कह णु काअव्वं ॥४७६॥

वहुविहविलासरसिए सुरए महिलाण को उवज्झाओ ।
सिक्खइ असिक्खिआइ वि सव्वो णेहाणुवंधेण ॥४७७॥

वण्णवसिए विअत्थसि सच्चं चिअ सो तुए ण संभविओ ।
ण हु होंति तम्मि दिट्ठे सुत्थावत्थाइ अंगाई ॥४७८॥

आसण्णविवाहदिणे अहिणववहुसंगमुस्सुअमणस्स ।
पढमघरिणीअ सुरअं वरस्स हिअए ण संठाइ ॥४७९॥

जइ लोअणिंदिअं जइ अमंगलं जइ वि मुक्कमज्जाअं ।
पुप्फवइदंसणं तह वि देइ हिअअस्स णिव्वाणं ॥४८०॥

जइ ण छिवसि पुप्फवइं पुरओ ता कीस वारिओ ठासि ।
छित्तो सि चुलचुलंतेहि धाविऊण ँम्ह हत्थेहि ॥४८१॥

उज्जागरअकसाइअगरुअच्छी मोहमंडणविलक्खा ।
लज्जइ लज्जालुइणी सा सुहअ सहीण वि वराई ॥४८२॥

ण वि तह अइगरुएण वि तम्मइ हिअए भरेण गब्भस्स ।
जह विवरीअणिहुअणं पिअम्मि सोण्हा अपावंती ॥४८३॥

अगणिअजणाववाअं अवहत्थिअगुरुअणं वराईए ।
तुह गलिअदंसणासाइ तीअ वलिउं चिरं रुण्णं ॥४८४॥

हिअअं हिअए णिहिअं चित्तालिहिअ व्व तुह मुहे दिट्ठी ।
आलिंणरहिआइं णवरं झिज्जंति अंगाई ॥४८५॥

अहअं विओअतणुई दुसहो विरहाणलो चलं जीअं ।

अप्याहिज्जउ किं सहि जाणसि तं चेअ जं जुत्तं ॥४८६॥

तुह विरहुज्जागरओ सिविणे वि ण देइ दंसणसुहाइ ।
वाहेण पहालोअणविणोअणं से हअं तं पि ॥४८७॥

अण्णावराहकुविओ जह तह कालेण गच्छइ पसाअं ।
वेसत्तणावराह कुविअं कह तं पसाएमि ॥४८८॥

दीससि पिआइ जंपसि सब्भावो सुहअ एत्तिओ च्चेअ ।
फालेइऊण हिअअं साहसु को दावए कस्स ॥४८९॥

उअअं लहिउं उत्ताणिआणणा होंति के वि सविसेसं ।
रित्ता णमंति सुइरं रहट्ठघडिअ व्व कापुरिसा ॥४९०॥

भग्गपिअसंगमं केत्तिअं व जोण्हाजलं णहसरम्मि ।
चंदअरपणालणिझरणिवहपडंतं ण णिट्ठाइ ॥४९१॥

सुंदरजुआणजणसंकुले वि तुह दंसणं विमग्गंती ।
रण्णे व भमइ दिट्ठी वराइआए समुव्विग्गा ॥४९२॥

अइकोवणा वि सासू रुआविआ गअवईअ सोण्हाए ।
पाअपडनोणआए दोसु वि गलिएसु वलएसु ॥४९३॥

रोवंति व्व अरण्णे दूसहरइकिरिणफंससंतत्ता ।
अइतारझिल्लिविरुएहि पाअवा गिम्हमज्झण्हे ॥४९४॥

पढमणिलीणमहुरमहुलोहिल्लालिउलवद्धझंकारं ।
अहिमअरकिरणणिउरुवचुंविअं दलइ कमलवणं ॥४९५॥

गोत्तक्खलणं सोऊण पिअअमे अज्ज तीअ छणादिअहे ।
वज्झमहिस्स माल व्व मंडणं उअह पडिहाइ ॥४९६॥


महमहइ मलअवाओ अत्ता वारेइ मं घरा णित्तिं ।
अंकोल्लपरिमलेण वि जो क्खु मुओ सो मुओ च्चेअ ॥४९७॥

मुहपेच्छओ पई से सा वि हु सविसेसदंसणुम्मइआ ।
दो वि कअत्था पुहई अमहिलपुरिसं व मण्णंति ॥४९८॥

खेमं कत्तो खेमं जो सो खुज्जंवओ घरद्वारे ।
तस्स किर मत्थआओ को वि अणत्थो समुप्पण्णो ॥४९९॥

रसिअजणहिअअदइए कइवच्छलपमुहसुकइणिम्मइए ।
सत्तसअम्मि समत्तं पंचमगाहासअं एअं ॥५००॥





आउच्छणविच्छाअं जाआइ मुहं णिअच्छमाणेण ।
पहिएण सोअणिअलाविएण गंतुं चिअ ण इट्ठं ॥५०१॥

सूईवेहे मुसलं विच्छुहमाणेण डड्डलोएण ।
एक्कग्गामे वि पिओ समेहि अच्छीहि वि ण दिट्ठो ॥५०२॥

अज्जं पि दाव एक्कं मा मं वारेहि पिअसहि रुअंतिं ।
कल्लिं उण तम्मि गए जइ ण मुआ ता ण रोइस्सं ॥५०३॥

एहि त्ति वाहरंतम्मि पिअअमे उअह ओणअमुहीए ।
विउणावेढिअजहणत्थलाइ लज्जोणअं हसिअं ॥५०४॥

मारेसि कं ण मुद्धे इमेण रत्तंततिक्खविसमेण ।
भुलआचावविणिग्गअतिक्खअरद्धच्छिभल्लेण ॥५०५॥

तुह दंसणे सअण्हा सद्धं सोऊण णिग्गआ जाइं ।
तइ बोलीणे ताइ पआइ वोढव्वआ जाआ ॥५०६॥

ईसामच्छररहिए हि णिव्विआरेहि मामि अच्छीहिं ।
एण्हिं जणो जणम् मिव णिअच्छए कुह ण झिज्जामो ॥५०७॥

वाउद्धअसिचअविहाविओरुदिट्ठेण दंतमग्गेण ।
वहुमाआ तोसिज्जइ णिहाणकलसस्स व मुहेण ॥५०८॥

हिअअम्मि वससि ण करेसि मण्णुअं तह वि णेहभरिएहिं ।
संकिज्जसि जुअइसहावगलिअधीरेहि अम्हेहिं ॥५०९॥

अण्णं पि किं पि पाविहिसि मूढ मा तम्म दुक्खमेत्तेण ।
हिअअ पराहीणजणं महंत तुह केत्तिअं एअं ॥५१०॥

वेसो सि जीअ पंसुल अहिअअरं सा हु वल्लहा तुज्झ ।
इअ जाणिऊण वि मए ण ईसिअं डड्डपेम्मस्स ॥५११॥

सा आम सुहअ गुणरूअसोहिरी आम णिग्गुणा अहअं ।
भण तीअ जो ण सरिसो किं सो सव्वो जणो मरउ ॥५१२॥

संतम् असंतं दुक्खम् सुहं च जाओ घरस्स जाणंति ।
ता पुत्तअ महिलाओ सेसाउ जरा मणुस्साणं ॥५१३॥

हसिएहि उवालंभा अच्चुवआरेहि खिज्जिअव्वाइं ।
अंसूहि भंडणाइ एसो मग्गो सुमहिलाणं ॥५१४॥

उल्लावो मा दिज्जउ लोअविरुद्धं ति णाम काऊण ।
समुहावडिए को उण वेसे दिट्ठिं ण पाडेइ ॥५१५॥

साहीणपिअअमो दुग्गओ वि मण्णइ कअत्थम् अप्पाणं ।
पिअरहिओ उण पुहविं पि पाविउं दुग्गओ च्वेअ ॥५१६॥

किं रुअसि किं व सोअसि किं कुप्पसि सुअणु एक्कमेक्कस्स ।
पेम्मं विसं व विसमं साहसु को रुभिउं तरइ ॥५१७॥

ते अ जुआणा ता गामसंपआ तं च अम्ह तारुणं ।
अक्खाणअं व लोओ कहेइ अम्हे वि तं सुणिमो ॥५१८॥

वाहोहभरिअगंडाहराइ भणिअं विलक्खहसिरीए ।
अज्ज वि किं रूसिज्जइ सवहावत्थं गअं पेम्मं ॥५१९॥

वण्णगघअतुप्पमुहिं जो मं अइआअरेण चुवंतो ।
एणिहं सो भूसणभूसिअं पि अलसाअइ छिवंतो ॥५२०॥

णीलवडपाउअंगि त्ति मा हु णं परिहरिज्जासु ।
पट्ठंसुअं पि णद्धं रअम्मि अवणिज्जइ च्चेअ ॥५२१॥

सच्चं कलहे कलहे सुरआरंभा पुणो णवा होंति ।
माणो उण माणंसिणि गरुओ पेम्मं विणासेइ ॥५२२॥

माणुम्मत्ताइ मए अकारणं कारणं कुणंतीए ।
अइसणेण पेम्मं विणासिअं पोढवाएण ॥५२३॥

अणुऊलं चिअ वोत्तुं वहुवल्लह वल्लहे वि वेसे वि ।
कुविअं च पसाएउं सिक्खइ लोओ तुमाहितो ॥५२४॥

लज्जा चत्ता सीलं च खंडिअं अजसघोसणा दिण्णा ।
जस्स कएणं पिअसहि सो च्चेअ जणो जणो जाओ ॥५२५॥

हसिअं अइट्ठदंतं भमिअम् अणिक्कंतदेहलीदेसं ।
दिट्ठम् अणुक्खित्तमुहं एसो मग्गो कुलवहूणं ॥५२६॥

धूलिमइलो वि पंककिओ वि तणरइअदेहभरणो वि ।
तह वि गइंदो गरुअत्तणेण ढक्कं समुव्वहइ ॥५२७॥

करमरि कीस ण गम्मइ को गव्वो जेण मसिणगमणा सि ।
अदिट्ठदंतं हसिरीअ जंपिअं चोर जाणिहिंसि ॥५२८॥

थोरंसुएहि रुण्णं सवत्तिवग्गेण पुप्फवइआए ।
भुअसिहरं पइणो पेच्छिऊण सिरलग्गतुप्पलिअं ॥५२९॥

लोओ जूरइ जूरउ वअणिज्जं होइ होउ तं णाम ।
एहि णिमज्जसु पासे पुप्फवइ ण एइ मे णिद्दा ॥५३०॥

जं जं पुलएमि दिसं पुरओ लिहिओ व्व ईससे तत्थ ।
तुह पडिमापरिवाडिं वहइ व सअलं दिसाचक्कं ॥५३१॥

ओसरइ धुणइ साहं खोक्खामुहलो पुणो समुल्लिहइ ।
जंवूफलं ण गेणहइ भमरो त्ति कई पढमडक्को ॥५३२॥

ण छिवइ हत्तेण कई कंडूइभएण पत्तलणिउंजे ।
दरलंविगोच्छकइक्खुसच्छहं वाणरीहत्थं ॥५३३॥

सरसा वि सूसइ च्चिअ जाणइ दुक्खाइ मुद्धहिअआ वि ।

स्ता वि पंडुर च्चिअ जाआ वरई तुह विओए ॥५३४॥

आरुहइ जुण्णअं खुज्जअं पि जं उअह वल्लरी तउसी ।
णीलुप्पलपरिमलवासिअस्स सरअस्स सो दोसो ॥५३५॥

उप्पहपहाविअजणो पविअंभिकलअलो पहअतूरो ।
अव्वो सो च्चैअ छणो तेण विणा गामडाहो व्व ॥५३६॥

उल्लावतेण ण होइ कस्स पासट्टिएण थड्डेण ।
संका मसाणपाअवलविअचोरेण व खलेण ॥५३७॥

असमत्तगरुअकज्जे एण्हिं पहिए घरं णिअत्तंते ।
णवपाउसो पिउच्छा हसइ व कुडअट्टहासेहिं ॥५३८॥

दट्ठण उण्णमंते मेहे आमुक्कजीविआसाए ।
पहिअघरिणीअ डिंभो ओरुण्णमुहीअ सच्चविओ ॥५३९॥

अविहवलक्खणवलअं ठाणं णेतो पुणो पुणो गलिअं ।
सहिसत्थो च्चिअ माणंसिणीअ वलआरओ जाओ ॥५४०॥

पहिअवहू विवरंतरगलिअजलोल्ले घरे अणोल्लं पि ।
उदेसं अविरअवाहसलिलणिवहेण ओल्लेइ ॥५४१॥

जीहाइ कुणंति पिअं होंति अ हिअअम्मि णिव्वुइं काउं ।
पीडिज्जंता वि रसं जणेंति उच्छू कुलीणा अ ॥५४२॥

दीसइ ण चूअमउलं अत्ता ण अ वाइ मलअगंधवहो ।
पत्तं वसंतमासं साहइ उक्कंठिअं चेअ ॥५४३॥

अंववणे भमरउलं ण विणा कज्जेण ऊसुअं भमइ ।
कत्तो जलणेण विणा धूमस्स सिहाउ दीसंति ॥५४४॥

दइअकरग्गहलुलिओ धम्मिल्लो सीहुगंधिअं वअणं ।
मअणम्मि एत्तिअं चिअ पसाहणं हरइ तरुणीणं ॥५४५॥

गामतरुणीउ हिअअं हरंति छेआण थणहरिल्लीओ ।
मअणे कुसुंभराइल्लकंचुआभरणमेत्ताओ ॥५४६॥

आलोअंत दिसाओ ससंत जंभंत गंत रोअंत ।
मुच्छंत पडंत खलंत पहिअ किं ते पउत्थेण ॥५४७॥

दट्ठण तरुणसुरअं विविहविलासेहि करणसोहिल्लं ।
दीवो वि तग्गअमणो गअं पि तेल्लं ण लक्खेइ ॥५४८॥

पुणरुत्तकरप्फालणम् उहअतडुल्लिहणपीडणसआइं ।
जूहाहिवस्स माए पुणो वि जइ णम्मआ सहइ ॥५४९॥

वोडसुणओ विवण्णो अत्ता मत्ता पई वि अण्णत्थो ।
फडही वि मोडिआ महिसएण को कस्स साहेउ ॥५५०॥

सकअग्गहरहसुत्ताणिआणणा पिअइ पिअमुहविइण्णं ।
थोअं थोअं रोसोसहं व उअ माणिणी मइरं ॥५५१॥

गिरिसोत्तो त्ति भुअंगं महिसो जीहाइ लिहइ संतत्तो ।
महिसस्स कण्हपत्थरझरो त्ति सप्पो पिअइ लालं ॥५५२॥

पंजरसारिं अत्ता ण णेसि किं एत्थ रइहराहितो ।
वीसंभजंपिआइं एसा लोआण पअडेइ ॥५५३॥

एद्वहमेत्ते गामे ण पडइ भिक्क त्ति कीस मं भणसि ।
धम्मिअ करंजभंजअ जं जीअसि तं पि दे वहुअं ॥५५४॥

जंतिअ गुलं विमग्गसि ण अ मे इच्छाइ वाहसे जंतं ।
अणरसिअ किं ण आणसि ण रसेण विणा गुलो होइ ॥५५५॥

पत्तणिअंवप्फंसा ण्हाणुत्तिण्णाइ सामलंगीए ।
जलविंदुएहि चिहुरा रुअंति वंधस्स व भएण ॥५५६॥

गामंगणणिअडिअकण्हवक्ख वड तुज्झ दूरम् अणुलग्गो ।
तत्तिल्लपडिक्खअभोइओ वि गामो ण उव्विग्गो ॥५५७॥

सुप्पं डड्ढं चणआ ण भज्जिआ सो जुआ अइक्कंतो ।
अत्ता वि घरे कुविआ भूआण व वाइओ वंसो ॥५५८॥

पिसुणेंति कामिणीणं जललुक्कपिआवऊहणसुहेल्लिं ।
कंडइअकवोलुप्फुल्लणिच्चलच्छीइ वअणाइ ॥५५९॥

अहिणवपाउसरसिएसु सूँहइ सामाइएसु दिअहेसु ।
रहसपसारिअगीवाण णच्चिअं मोरवुंदाणं ॥५६०॥

महिसक्खंधविलग्गं घोलइ सिंगाहअं सिमिसिमंतं ।
आहअवीणाझंकारसद्दमुहलं मसअवुंदं ॥५६१॥

रेहंति कुमुअदलणिच्चलट्ठिआ मत्तमहुअरणिहाआ ।
ससिअरणीसेसपणासिअस्स गंठि व्व तिमिरस्स ॥५६२॥

उअह तरुकोडराओ णिक्कंतं पूसुआण रिंछोलिं ।
सरए जरिओ व्व दुमो पित्तं व सलोहिअं वमइ ॥५६३॥

धाराधुव्वंतमुहा लंविअवक्खा णिउंचिअग्गीवा ।
वइवेढणेसु काआ सूलाहिण्ण व्व दीसंति ॥५६४॥

ण वि तह अनालवंती हिअअं दूमेइ माणिणी अहिअं ।
जह दूरविअंभिअगरुअरोसमज्झत्थभणिएहिं ॥५६५॥

गंधं अग्घाअंतअ पिक्ककलंवाण वाहभरिअच्छ ।
आससु पहिअजुआणअ घरिणिमुहं मा ण पेच्छिहिसि ॥५६६॥

गज्ज महं चिअ उवरिं सव्वत्थामेण लोहहिअअस्स ।
जलहर लंवालइअं मा रे मारेहिसि वराइं ॥५६७॥

पंकमइलेण छीरेक्कपाइणा दिण्णजाणुवडणेण ।
आनंदिज्जइ हलिओ पुत्तेण व सालिछेत्तेण ॥५६८॥

कह मे परिणइआले खलसंगो होहिइ त्ति चिंतंतो ।
ओणअमुहो ससूओ रुअइ व साली तुसारिण ॥५६९॥

संझाराओत्थइओ दीसइ गअणम्मि पडिवआचंदो ।
रत्तदुऊलंतरिओ थणणहलेहो व्व णववहूए ॥५७०॥

अइ दिअर किं ण पेच्छसि आआसं किं मुहा पलोएसि ।
जाआइ वाहुमूलम्मि अद्धअंदाण परिवाडि ॥५७१॥

वाआइ किं भणिज्जउ केत्तिअमेत्तं व लिक्खए लेहे ।
तुह विरहे जं दुक्खं तस्स तुमं चेअ गहिअत्थो ॥५७२॥

मअणग्गिणो व्व धूमं मोहणपिच्छिं व लोअदिट्ठीए ।
जोव्वणधअं व मुद्धा वहइ सुअंधं चिउरभारं ॥५७३॥

रूअं सिट्ठं चिअ से असेसपुरिसे णिअत्तिअच्छेण ।
वाहोल्लेण इमीए अजंपमाणेण वि मुहेण ॥५७४॥

रुंदारविंदमंदिरमअरंदाणंदिआलिरिंछोली ।
झणझणइ कसणमणिमेहल व्व महुमासलच्छीए ॥५७५॥

कस्स करो बहुपुण्णप्फलेक्कतरुणो तुहं विसम्मिहइ ।
थणपरिणाहे मम्महणिहाणकलसे व्व पारोहो ॥५७६॥

चोरा सभअसतण्हं पुणो पुणो पेसअंति दिट्ठीओ ।
अहिरक्खिअणिहिकलसे व्व पोढवइआथनुच्छंगे ॥५७७॥

उव्वहइ णवतणंकुरोमंचपसाहिआइ अंगाई ।
पाउसलच्छीअ पओहरेहि परिपेल्लिओ विंझो ॥५७८॥

आम वहला वणाली मुहला जलरंकुणो जलं सिसिरं ।
अण्णणईण वि रेवाइ तह वि अण्णे गुणा के वि ॥५७९॥

एह इमीअ णिअच्छह परिणअमालूरसच्छहे थणए ।
तुंगे सप्पुरिसमणोरहे व्व हिअए अमाअंते ॥५८०॥

हत्थाहत्थिं अहम् अहमिआइ वासागमम्मि मेहेहिं ।
अव्वो किं पि रहस्सं छण्णं पि णहंगणं गलइ ॥५८१॥

केत्तिअमेत्तं होहिइ सोहगं पिअअमस्स भमिरस्स ।
महिलामअणछुहाउलकडक्खविक्खेवघेप्पंतं ॥५८२॥

णिअधणिअं उवऊहसु कुक्कुडसद्देण झत्ति पडिवुद्धो ।
परवसहिवाससंकिर णिअए वि घरम्मि मा भासु ॥५८३॥

खरपवणरअगलत्थिअगिरिऊडावडणभिण्णदेहस्स ।
धुक्काधुक्कइ जीअं व विज्जुआ कालमेहस्स ॥५८४॥

मेहमहिसस्स णज्जइ उअरे सुरचावकोडिभिण्णस्स ।
कंदंतस्स सविअणं अंतं व पलंवए विज्जू ॥५८५॥

णवपल्लवं विसण्णा पहिआ पेच्छंति चूअरुक्खस्स ।

कामस्स लोहिउपंगराइअं हत्थभल्लं व ॥५८६॥

महिलाणं चिअ दोसो जेण पवासम्मि गब्बिआ पुरिसा ।
दो तिण्णि जाव ण मरंति ता ण विरहा समप्पंति ॥५८७॥

वालअ दे वच्च लहुं मरइ वराई अलं विलंवेण ।
सा तुज्झ दंसणेण वि जीवेज्ज ण एत्थ संदेहो ॥५८८॥

तंमिरपसरिअहुअवहजालोलिपलीविए वणाभोए ।
किंसुअवणं ति कलिऊण मुद्धहरिणो ण णिक्कमइ ॥५८९॥

णिहुअणसिप्पं तह सारिआइ उल्लाविअं म्ह गुरुपुरओ ।
जह तं वेलं माए ण आणिमो कत्थ वच्चामो ॥५९०॥

पच्चगुप्फुल्लदलुल्लसंतमअरंदपाणलेहलओ ।
तं ण त्थि कुंदकलिआइ जं ण भमरो महइ काउं ॥५९१॥

सो को वि गुणाइसओ ण आणिमो मामि कुंदलइआए ।
अच्छीहिं चिअ पाउं अहिलस्सइ जेण भमरेहिं ॥५९२॥

एक्क च्चिअ रूअगुणं गामणिधूआ समुव्वहइ ।
अणिमिसणअणो सअलो जीए देवीकओ गामो ॥५९३॥

मण्णे आसाओ च्चिअ ण पाविओ पिअअमाहररसस्स ।
तिअसेहि जेण रअणाअराहि अमअं समुद्धरिअं ॥५९४॥

आअण्णाअट्ठिअणिसिअभल्लमम्माहआइ हरिणीए ।
अइंसणो पिओ होहिइ त्ति वलिउं चिरं दित्थो ॥५९५॥

विसमट्ठिअपिक्केक्कंवदंसणे तुज्झ सत्तुघरिणीअ ।
को को ण पत्थिओ पहिआणं डिंभे रुअंतम्मि ॥५९६॥


मालारी ललिउल्लुलिअवाहुमूलेहि तरुणहिअआइ ।
उल्लूरइ सज्जुल्लूरिआइ कुसुमाइ दावेती ॥५९७॥

मज्झो पिओ कुअंडो पल्लिजुआणा सवत्तीओ ।
जह जह वट्ठंति थणा तह तह झिज्जंति पंच वाहीए ॥५९८॥

मालारीए वेल्लहलवाहुमूलावलोअणसअण्हो ।
अलिअं पि भमइ कुसुमग्घपुच्छिरो पंसुलजुआणो ॥५९९॥

रसिअजणहिअअदइए कइवच्छलपमुहसुकइणिम्मइए ।
सत्तसअम्मि समत्तं सट्ठं गाहासअं एअं ॥६००॥





अकअण्णुअ घणवण्णं घणवण्णंतरिअतरणिअरणिअरं ।
जइ रे रे वाणीरं रेवाणीरं पि णो भरसि ॥६०१॥

मंदं पि ण आणइ हलिअणंदणो इह हि डड्ढगामम्मि ।
गहवइसुआ विवज्जइ अवेज्जए कस्स साहामो ॥६०२॥

एक्कक्कमपरिरक्खणपहारसमुहे कुरंगमिहुणम्मि ।
वाहेण मण्णुविअलंतवाहधोअं धणुं मुक्कं ॥६०३॥

ता सुहअ विलंव खणं भणामि कीअ वि कएण अलम् अहवा ।
अविआरिअकज्जारंभआरिणी मरउ ण भणिस्सं ॥६०४॥

भोइणिदिण्णपहेणअचक्खिअदुस्सिक्खिओ हलिअउत्तो ।
एत्ताहे अण्णपहेणआण छीवोल्लअं देइ ॥६०५॥

पच्चूसमऊहावलिपरिमलणसमूससंतवत्ताणं ।
कमलाण रअणिविरमे जिअलोअसिरी महंमहइ ॥६०६॥

वाउवेल्लिअसाहुलि थएसु फुडदंतमंडलं जहणं ।
चडुआरअं पइं मा हु पुत्ति जणहासिअं कुणसु ॥६०७॥

वीसत्थहसिअपरिसक्किआण पढमं जलंजली दिण्णो ।
पच्छा वहूअ गहिओ कुडंवभारो णिमज्जंतो ॥६०८॥

गम्मिहिसि तस्स पासं सुंदरि मा तुअर वड्डउ मिअंको ।
दुद्धे दुद्धं मिव चंदिआइ को पेच्छइ मुहं दे ॥६०९॥

जइ जूरइ जूरउ णाम मामि परलोअवसणिओ लोओ ।
तह वि वला गामणिणंदणस्स वअणे वलइ दिट्ठी ॥६१०॥

गेहं व वित्तरहिअं णिज्झरकुहरं व सलिलसुण्णइअं ।
गोहणरहिअं गोठं व तीअ वअणं तुह विओए ॥६११॥

तुह दंसणेण जणिओ इमीअ लज्जाउलाइ अणुराओ ।
दुग्गअमणोरहो विअ हिअअ च्चिअ जाइ परिणामं ॥६१२॥

जं तणुआअइ सा तुह कएण किं जेण पुच्छसि हसंतो ।
अह गिम्हे मह पअई एव्वं भणिऊण ओरुण्णा ॥६१३॥

वण्णक्कमरहिअस्स वि एस गुणो णवरि चित्तकम्मस्स ।
णिमिसं पि जं ण मुंचइ पिओ जणो गाढम् उवऊढो ॥६१४॥

अविहत्तसंधिवंधं पढमरसुब्भेअपाणलोहिल्लो ।
उव्वेल्लिउं ण आणइ खंडइ कलिआमुहं भमरो ॥६१५॥

दरवेविरोरुजुअलासु मउलिअच्छीसु लुलिअचिहुरासु ।
पुरिसाइरीसु कामो पिआसु सज्जाउहो होइ ॥६१६॥

जं जं ते ण सुहाअइ तं तं ण करेमि जं मम्ऽ आअत्तं ।
अहअं चिअ जं ण सुहामि सुहअ तं किं मम्ऽ आअत्तं ॥६१७॥

वावारविसंवाअं सअलावअवाण कुणइ हअलज्जा ।
सवणाण उणो गुरुसंणिहे वि ण णिरुंझइ णिओअं ॥६१८॥

किं भणह मं सहीओ मा मर दीसिहइ सो जिअंतीए ।
कज्जालाओ एसो सिणेहमग्गो उण ण होइ ॥६१९॥

एक्कल्लमओ दिट्ठीअ मइअ तह पुलइओ सअण्हाए ।
पिअजाअस्स जह धणुं पडिअं वाहस्स हत्थाओ ॥६२०॥

णलिणीसु भमसि परिमलसि सत्तलं मालइं पि णो मुअसि ।
तरलत्तणं तुह अहो महुअर जइ पाडला हरइ ॥६२१॥

दोअंगुलअकवालअपिणद्धसविसेसणीलकंचुइआ ।
दावेइ थणत्थलवणिअं व तरुणी जुअजणाणं ॥६२२॥

रक्खेइ पुत्तअं मत्थएण ओच्छोअअं पडिच्छंती ।
अंसूहि पहिअघरिणी ओल्लिज्जंतं ण लक्खेइ ॥६२३॥

सरए सरम्मि पहिआ जलाइ कंदोट्टसुरहिगंधाइ ।
धवलच्छाइ सअण्हा पिअंति दइआण व मुहाइं ॥६२४॥

अब्भंतरसरसाओ उवरिं पव्वाअवद्धपंकाओ ।
चंक्कमंतम्मि जणे समूससंति व्व रच्छाओ ॥६२५॥

मुहपुंडरीअछाआइ संठिए उअह राअहंसे व्व ।
छणपिट्टकुट्टणुच्छलिअधूलिधवले थणे वहइ ॥६२६॥

तह तेण वि सा दिट्ठा तीअ वि तह तस्स पेसिआ दिट्ठी ।
जह दोणह वि समअं चिअ णिव्वुत्तरआइ जाआइ ॥६२७॥

वाउलिआपरिसोसणणिउंजपत्तलणसुलहसंकेआ ।
सोहग्गकणअकसवट्ट गिम्ह मा कह वि झिज्जिहिसि ॥६२८॥

दुस्सिक्खिअरअणपसिक्खएहि धिट्ठो सि पत्थरे ताव ।
जा तिलमेत्तं वट्टसि मरगअ का तुज्झ मुल्लकहा ॥६२९॥

जह चिंतेइ परिअणो आसंकइ जह अ तस्स पडिवक्खो ।
वालेण वि गामणिणंदणेण तह रक्खिआ पल्ली ॥६३०॥

अण्णेसु पहिअ पुच्छसु वाहअपुत्तेसु पुसिअचम्माइं ।
अम्हं वाहजुआणो हरिणेसु धणुं ण णामेइ ॥६३१॥

गअवहुवेहव्वअरो पुत्तो मे एक्ककंडविणिवाई ।
तह सोण्हाइ पुलइओ जह कंडवरंडअं वहइ ॥६३२॥

विंझारुहणालावं पल्ली मा कुणउ गामणी ससइ ।
पच्चुज्जिविओ जइ कह वि सुणइ ता जीविअं मुअइ ॥६३३॥

अप्पाहेइ मरंतो पुत्तं पल्लीवई पअत्तेण ।

मह णामेण जह तुमं ण लज्जसे तह करेज्जासु ॥६३४॥

अणुमरणपत्थिआए पच्चागअजीविए पिअअमम्मि ।
वेहव्वमंडणं कुलवहूअ सोहग्गअं जाअं ॥६३५॥

महुमच्छिआइ दट्ठं दट्ठण मुहं पिअस्स सूणोढं ।
ईसालुई पुलिदी रुक्खेच्छाअं गआ अण्णं ॥६३६॥

धण्णा वसंति णीसंकमोहणे वहलपत्तलवइम्मि ।
वाअंदोलणओणुविअवेणुगहणे गिरिग्गामे ॥६३७॥

पुप्फुल्लघणकलंवा णिद्धोअसिलाअला मुइअमोरा ।
पसरंतोज्झरमुहला उच्छाहंते गिरिग्गामा ॥६३८॥

तह परिमलिआ गोवेण तेण हत्थं पि जा ण ओल्लेइ ।
स च्चिअ खडणा एण्हं पेच्छह कुडदोहिणी जाआ ॥६३९॥

धवलो जिअइ तुह कए धवलस्स कए जिअंति गिट्ठीओ ।
जिअ तंवे अम्ह वि जीविएण गोढं तुमाअत्तं ॥६४०॥

अग्घाइ छिवइ चुंवइ ठवेइ हिअअम्मि जणिअरोमंचो ।
जाआकवोलसरिसं पेच्छह पहिओ महुअपुप्फं ॥६४१॥

उअ ओल्लिज्जइ मोहं भुअंगकित्तीअ कडअलग्गाइ ।
ओज्झरधारासद्धालुएण सीसं वणगएण ॥६४२॥

कमलं मुअंतं महुअर पिक्ककइत्थाण गंधलोहेण ।
आलेक्खलड्डुअं पामरो व्व छिविऊण जाणिहिसि ॥६४३॥

गिज्जंते मंगलगाइआहि वरगोत्तदिण्णअण्णाए ।
सोउं व णिग्गओ उअह होंतवहुआइ रोमंचो ॥६४४॥

मण्णे आअण्णंता आसण्णविवाहमंगलुग्गीअं ।
तेहि जुआणेहि समं हसंति मं वेअसकुडुंगा ॥६४५॥

उअगअचउत्थिमंगलहोंतविओअसविसेसलग्गेहि ।
तीअ वरस्स अ सेअंसुएहि रुण्णं व हत्थेहि ॥६४६॥

ण अ दिट्ठिं णेइ मुहं ण अ छिविउं देइ णा लवइ किं पि ।
तह वि हु किं पि रहस्सं णववहुसंगो पिओ होइ ॥६४७॥

अलिअपसुत्तवलंतम्मि णववरे णववहूअ वेवंतो ।
संवेल्लिओरुसंजमिअवत्थगांठिं गओ हत्थो ॥६४८॥

पुच्छिज्जंती ण भणइ गहिआ पप्फुरइ चुंविआ रुअइ ।
तुण्हक्का णववहुआ कआवराहेण उवऊढा ॥६४९॥

तत्तो च्चिअ होंति कहा विअसंति तहिं तहिं समप्पंति ।
किं मण्णे माउच्छा एक्कजुआणो इमो गामो ॥६५०॥

जाइ वअणाइ अम्हे वि जंपिमो ताइ जंपइ जणो वि ।
ताइं चिअ तेण पजंपिआइ हिअअं सुहावेति ॥६५१॥

सव्वाअरेण मग्गह पिअं जणं जइ सुहेण वो कज्जं ।
जं जस्स हिअअदइअं तं ण सुहं जं तहिं ण त्थि ॥६५२॥

दीसंतो दिट्ठिसुहो चित्तिज्जंत मणवल्लहो अत्ता ।
उल्लावंतं सुइसुहो पिओ जणो णिच्च रमणिज्जो ॥६५३॥

ठाणब्भट्ठा परिगलिअपीणआ उण्णईअ परिचत्ता ।
अम्हे उण ठेरिपओहर व्व उअरे च्चिअ णिसन्गा ॥६५४॥

पच्चूसागअ रंजिअदेह पिआलोअ लोअणाणंद ।
अण्णत्तखविअसव्वरि णहभूसण दिणवइ णमो दे ॥६५५॥

विवरीअसुरअलेहड पुच्छसि मह कीस गब्भसंभूइं ।
ओअत्ते कुंभमुहे जललवकणिआ वि किं ठाइ ॥६५६॥

अच्चासण्णविवाहे समं जसोआइ तरुणगोवीहिं ।
वड्ढंते महुमहणे संवधा णिणहुविज्जंति ॥६५७॥

जं जं आलिहइ मणो आसावत्तीहि हिअअफलअम्मि ।
तं तं वालो व्व विही णिहुअं हसिरुण पम्हुसइ ॥६५८॥

अणुहुत्तो करफंसो सअलअलापुण्ण पुण्णदिअहम्मि ।
वीआसंगकिसंगअ एण्हें तुह वंदिमो चलणे ॥६५९॥

दूरंतरिए वि पिए कह वि णिअत्ताइ मज्झ णअणाइ ।
हिअअं उण तेण समं अज्ज वि अणिवारिअं भमइ ॥६६०॥

तस्स कहाकंतइए सद्वाअण्णणसमोसरिअकोवे ।
समुहालोअणकंपिरि उवऊढा किं पवज्जिहिसि ॥६६१॥

भरणमिअणीलसाहग्गखलिअचलणद्धविहुअवक्खउडा ।
तरुसिहरेसु विहंगा कह कह वि लहंति संठाणं ॥६६२॥

अहरमहुपाणघोरिल्लिआइ जं च रमिओ सि सविसेसं ।
असइ अलज्जिरि वहुसिक्खिरि त्ति मा णाह मण्णिहिसि ॥६६३॥

खाणेण अ पाणेण अ तह गहिओ मंडलो अडअणाइ ।
जह जारं अहिणंदइ भुक्कइ घरसामिए एंते ॥६६४॥

कंडंतेण अकंडं पल्लीमज्झम्मि विअडकोअंदं ।
पइमरणाहि वि अहिअं वाहेण रुआविआ अत्ता ॥६६५॥

अम्हे उज्जुअसीला पिओ वि पिअसहि विआरपरिओसो ।
ण हु अण्णा का वि गई वाहोहा कह पुसिज्जंतु ॥६६६॥

धवलो सि जइ वि सुंदरि तह वि तुए मज्झ रंजिअं हिअअं ।
राअभरिए वि हिअए सुहअ णिहितो ण रत्तो सि ॥६६७॥

चंचुपुडाहअविअलिअसहआररसेण सित्तदेहस्स ।
कीरस्स मग्गलग्गं गंधंधं भमइ भमरउलं ॥६६८॥

एत्थ णिमज्जइ एत्ता एत्थ अहं एत्थ परिअणो सअलो
पंथिअ रत्तीअंधअ मा मह सअणे णिमज्जिहिंसि ॥६६९॥

परिओससुंदराइं सुरएसु लहंति जाइ सोक्खाइ ।
ताइं चिअ उण विरहे खाउग्गिण्णाइ कीरंति ॥६७०॥

मग्गं चिअ अलहंतो हारो पीणुण्णआण थणआण ।
उब्बिग्गो भमइ उरे जमुणाणइफेणपुंजो व्व ॥६७१॥

एक्केण वि वडवीअंकुरेण सअलवणराइमज्झम्मि ।
तह तेण कओ अप्पा जह सेसदुमा तले तस्स ॥६७२॥

जे जे गुणिणो जे जे अ चाइणो जे विअट्ठुविण्णाणा ।
दारिद्रे विअक्खण ताण तुमं साणुराओ सि ॥६७३॥

जइ कोत्तिओ सि सुंदर सअलतिहीचंददंसणसुहाणं ।
ता मसिणं मोइज्जंतकंचुअं पेक्खसु मुहं से ॥६७४॥

समविसमणिव्विसेसा समंतओ मंदमंदसंचारा ।
अइरा होहिंति पहा मणोरहाणं पि दुल्लंघा ॥६७५॥

अइदीहराइ वहुए सीसे दीसंति वंसवत्ताइ ।
भणिए भणामि अत्ता तुम्हाण वि पंडरा पुट्ठी ॥६७६॥

अत्थक्करूसणं खणपसिज्जणं अलिअवअणणिव्वंधो ।
उम्मच्छरसंतावो पुत्तअ पअवी सिणेहस्स ॥६७७॥

पिज्जइ कण्णंजलिहिं जणरवमिलिअं पि तुज्झ संलावं ।
दुद्धं जलसम्मिलिअं सा वाला राअहंसि व्व ॥६७८॥

अइ उज्जुए ण लज्जसि पुच्छिज्जंती पिअस्स चरिआइं ।
सव्वंगसुरहिणो मरुवअस्स किं कुसुमरिद्धिहि ॥६७९॥

मुद्धे अपत्तिअंती पवालअंकुरअणिद्धलोहिअए ।
णिद्धोअधाउराए कीस सहत्थे पुणो धुअसि ॥६८०॥

उअ सिंधवपव्वअसच्छहाइ धुअतूलपुंजसरिसाईं ।
सोहंति सुअणु मुक्कोअआइ सरए सिअब्भाइं ॥६८१॥

आउच्छंति सिरेहि विवलिअहि उअ खडिअहि णिज्जंता ।
णिप्पच्छिमवलिअपलोइअहि महिसा कुडंगाइ ॥६८२॥

पुससु मुहं ता पुत्तिअ वाहोअरणं विसेसरमणिज्जं ।
मा एअं चिअ मुहमंडणं ति सो काहिइ पुणो वि ॥६८३॥

मज्झे पअणुअपंकं अवहोवासेसु साणचिक्खिल्लं ।
गामस्स सीससीमंतअं व रच्छामुहं जाअं ॥६८४॥

अवरणहागअजामाउअस्स विउणेइ मोहणुक्कंठं ।
वहुआइ घरपलोहरमज्जणपिसुणो वलअसदो ॥६८५॥

जुज्झचवेडामोडिअजज्जरकणस्स जुणमल्लस्स ।

कच्छाबंधो च्चिअ भीरुमल्लहिअं समुक्खणइ ॥६८६॥

आणंदंतेन तुमं पइणो पहएण पडहसद्देण ।
मल्लि ण लज्जसि णच्चसि दोहग्गे पाअडिज्जंते ॥६८७॥

मा वच्चह वीसंभं इमाण बहुचाडुअम्मणिउणाणं ।
णिव्वत्तिअकज्जपरम्मुहाण सुणआण व खलाणं ॥६८८॥

अण्णग्गामपउत्था कट्ठंती मंडलाण रिंछोलिं ।
अक्खंडिअसोहग्गा वरिससअं जिअउ मे सुणिआ ॥६८९॥

सच्चं साहसु देअर तह तह चडुआरण सुणएण ।
णिव्वत्तिअकज्जपरम्मुहत्तणं सिक्खिअं कत्तो ॥६९०॥

णिप्पण्णसस्सरिद्धी सच्छंदं गाइ पामरो सरए ।
दलिअणवसालितंडुलधवलमिअंकासु राईसु ॥६९१॥

अलिहिज्जइ पंकअले हलालिचलणेण कलमगोवीए ।
केआरसोअरुंभणतंसट्ठिअकोमलो चलणो ॥६९२॥

दिअहे दिअहे सूसइ संकेअअभंगवट्ठिआसंका ।
आवंडुरोणअमुही कलमेण समं कलमगोवी ॥६९३॥

णवकम्मिण उअ पामरेण दट्ठण पाउहारीओ ।
मोत्तव्वे जोत्तअपग्गहम्मि अवहीसिणी मुक्का ॥६९४॥

दट्ठण हरिअदीहं गोसे संढाण जूरए हलिओ ।
अंसईरहस्समग्गं तुसारधवले तिलच्छेत्ते ॥६९५॥

संकेल्लिओ व्व णिज्जइ खंडं खंडं कओ व्व पीओ व्व ।
वासागमम्मि मग्गो घरहुत्तमुहेण पहिएण ॥६९६॥


संझागहिअजलंजलिपडिमासंकंतगोरिमुहकमलं ।
अलिअं चिअ फुरिओट्ठं विअलिअमंतं हरं णमह ॥६९७॥

इअ सिरिहालविरइए पाउअकव्वम्मि सत्तसए ।
सत्तमसअं समत्तं गाहाण सहावरमणिज्जं ॥६९८॥

एण्हिं वारेइ जणो तइआ मूइल्लओ कहिं व गओ ।
जाहे विसं व जाअं सव्वंगपहोलिरं पेम्मं ॥६९९॥

कह तं पि तुइ ण णाअं जह सा आसंदिआण बहुआणं ।
काऊण उच्चवचिअं तुह दंसणलेहडा पडिआ ॥७००॥





चोराण कामुआण अ पामरपहिआण कुक्कुरो वडइ ।
रे रमह वहह वाहयह एत्थ तणुआए रअणी ॥७०१॥

अण्णोण्णकलक्खंतरपेसिअमेलीणदिट्ठिपसराइं ।
दो च्चिअ मण्णे कअभंडणाइ समअं पहसिआइं ॥७०२॥

सुहअ इअं मज्झ सही तुज्झ विओएण धारिउं पाणे ।
सव्वह चिअ ण समत्थ ति वुज्झिउं विरम गमणाओ ॥७०३॥

धण्णा वहिरंधरआ ते च्चिअ जीअंति माणुसे लोए ।
ण सुणंति पिसुणवअणं खलाण अद्धिं ण पेक्खंति ॥७०४॥

गामारुह म्हि गामे वसामि णअरट्ठिइं ण आणामि ।
णाअरिआणं पइणो हरेमि जा होमि सा होमि ॥७०५॥

ओसर रोत्तुं चिअ णिम्मिआइ मा पुससु मे हअच्छीइं ।
दंसणमेत्तुम्मइएहि जेहि सीलं तुह ण णाअं ॥७०६॥

रणरणअसुण्णहिअओ चिंततो विरहदुव्वलं जाअं ।
अमुणिअणिअवसही सो वोलीणो गाममज्झेण ॥७०७॥

एत्थ चउत्थं विरमइ गाहाण सअं सहावरमणिज्जं ।
सोऊण जं ण लग्गइ हिअए म्हरत्तणेण अमिअं पि ॥७०८॥

एसो कइणामंकिअगाहापडिवद्धवट्ठिआमोओ ।
सत्तसअओ समत्तो सालाहणविरइओ कोसो ॥७०९॥

सुअणो णि दीसइ च्चिअ खलबहुल डड्ढजीअलोअम्मि ।
जह काअसंकुला तह ण हंसपरिवारिआ पुहवी ॥७१०॥

जं मुच्छिआइ ण सुओ कलंवगंधेण तं गुण पडिअं ।
इअरा गज्जिअसद्धो जीएण विणा ण वोलंतो ॥७११॥

पीणपओहरलगं दिसाण पवसंतजलअसमअविइण्णं ।
सोहग्गपढमइण्हं पच्चाअइ सरणहपहं इंदधणुं ॥७१२॥

एत्ती मत्तम्मि थवा पुत्तीमत्तम्मि लअणा भत्ती ।
अगईअ अवत्थाए दिअहाई भित्तरं तरइ ॥७१३॥

जं असरणो व्व डड्ढो गामो साहीणवहुजुआणो वि ।
संभमविसंतुलाणं तं दुच्चरिअं तुह थणाणं ॥७१४॥

सो वि जुआ माणहणो तुमं पि माणस्स असहणा पुत्ति ।
मत्तच्छलेण गम्मउ सुराइ उवरिं पुससु हत्थं ॥७१५॥

केअइगंधहगव्विआरअरंजिआइणेहिं ।
कंठअसवलितणुतव छड्ढिअभवलाणं ॥७१६॥

अह सुअइ दिण्णपडिवक्खवेअणा पसिढिलेहि अंगेहिं ।
णिव्वत्तिअसुरअरसाणुवंधसुहणिब्भरं बहुआ ॥७१७॥

जइ तेण तुज्झ वअणं ण कअं मह कारणेण अ हआसे ।
सा कीस खंडिअतडं णिआहरं दूइ दुम्मेसि ॥७१८॥

निर्मलगगनतडागे तारागणकुसुमभितेतिमिरे ।
भिकरवोबालं चरति मृगांको मराल इव ॥७१९॥

दिट्ठाइ जं ण दिट्ठो सरलसहावाइ जं च णा ऽलविओ ।
उवआरो जं ण कओ तं चिअ कलिअं छइल्लेहिं ॥७२०॥

अविरलणिग्गअपुलओ पअडिअकंपो पमुक्कसिक्कारो ।
हेमंते पहिअजणो सुरआसत्तो व्व पडिहाइ ॥७२१॥

वहुविहविलासभरिए सुरए लब्भंति जाइ सोक्खाइं ।
विरहम्मि ताइ पिअसहि खाउग्गिण्णाइ कीरंति ॥७२२॥

सेउल्लणिअंवालग्गसण्हसिचअस्स मग्गम् अलहंतो ।
सहि मोहघोलिरो अज्ज तस्स हसिओ मए हत्थो ॥७२३॥

दूर्इकज्जाअण्णणपडिरोहं मा करेहिइ इमं ति ।
उत्थंघेइ व तुरिअं तिस्सा कण्णुप्पलं पुलओ ॥७२४॥

मा वच्चसु वीसंभं पुत्तअ चडुआरओ इमो लोओ ।
सूईवेहो कण्णस्स पेच्छ किं णिज्जइ पमाणं ॥७२५॥

अमिअमअं चिअ हिअअं हत्था तण्हाहरा सअण्हाणं ।
चंदमुहि कत्थ णिवसइ अमित्तदहणो तुह पआवो ॥७२६॥

दिट्ठीअ जाव पसरो ताव तुमं सुहअ णिव्वुइं कुणसि ।
वोलीणदंसणो तह तवेसि जह होउदिट्ठेण ॥७२७॥

गज्जंति घणा पंथाणो बहुतणा अ पसारिआ सरिआ ।
अज्ज वि उज्जुअसीले पइणो मग्गं पलोएसि ॥७२९॥

उण्हो त्ति समत्थिज्जइ डाहेण सरोरुहाण हेमंतो ।
चरिएहि णज्जइ जणो संगोवंतो वि अप्पाणं ॥७३०॥

उवहारिआइ समअं पिंडारे उअ कहं कुणंतम्मि ।
णववहुआइ सरोसं सव्व च्चिअ वछआ मुक्का ॥७३१॥

पज्जालिऊण अग्गिं मुहेण पुत्तिअ किणो समोसरसि ।
थणअलसपडिअपडिमा फुरंति ण छिवंति ते जाला ॥७३२॥

अग्गिं अब्भुत्तंतीअ पुत्ति पडिमागआ कवोलम्मि ।
कण्णालंविअपल्लवलच्छिं संधेइ ते जाला ॥७३३॥

कह दे धूमंधारे अब्भुत्तणं अग्गिणो समप्पिहइ ।
मुहकमलचुंवणालेहडम्मि पासट्टिए दिअरे ॥७३४॥

आअंवच्छं पअलंतवाहम् आवद्धथणहरुक्कपं ।

असमत्तं चिअ चिट्ठउ सिहिणो अब्भुत्तणम् इणं ते ॥७३५॥

छणपाहुणिए ऽत्ति किणो अज्ज वि णं भणह अंगसंतावं ।
जाआ अम्ह घरिल्लअगुणेण घरसामिणि च्चेअ ॥७३६॥

वण्णक्कमं ण आणसि ठाणविसुद्धी वि दे ण णिव्वडिआ ।
चित्तअर तह वि मग्गसि भोइणिकुट्टुम्मि आलिहिउं ॥७३७॥

विअलिअकलाकलावो चंदो मित्तस्स मंडलं विसइ ।
णिस्सरइ तादिसो च्चिअ गअविहवं को समुद्धरइ ॥७३८॥

णा ऽहं दूई सुंदर तीए पिओ सि ण अम्ह वावारो ।
सा मरइ तुज्झ विरहे एअं धम्मक्खरं भणिमो ॥७३९॥

जो होइ रसाइसओ सुविणट्ठाणं वि पुंडइच्छूणं ।
कत्तो सो होइ रसो मोहासाणं अणिच्छूणं ॥७४०॥

जइ वि हु दिल्लिंदिलिआ तह वि हु मा पुत्ति णग्गिआ भमसु ।
छेआ णअरजुआणो माअं धूआइ लक्खंति ॥७४१॥

गअगंडअगवअसरभसेरिहसदूलरिक्खजाईणं ।
थणआ वाहवहूए अभअं दाउं व णिक्कंता ॥७४२॥

भिउडीअ पुलोइस्सं णिब्भच्छिस्सं परंमुही होस्सं ।
जं भणह तं करिस्सं सहीउ जइ तं ण पेच्छिस्सं ॥७४३॥

जं केअवेण पेम्मं जं च वला जं च अत्थलोहेण ।
जं उवरोहणिमित्तं णमोणमो तस्स पेम्मस्स ॥७४४॥

कस्स ण सद्धा गरुअत्तणम्मि पइणो पसाअमाणस्स ।
जइ माणभंजणीओ ण होति हेमंतराईओ ॥७४५॥

अव्वो तर्हिंतर्हिं चिअ गअणे भमिऊण वीसमंतेण ।
वोहित्ताअसेण व्व हासिआ डड्डपेम्मेण ॥७४६॥

दे आ दुमसु तुमं चिय मा परिहर पुत्ति पढमदुमियं ति ।
किं कुट्टं णिअमुहअंदकंतिदुमिअं ण लक्खेसि ॥७४७॥

विज्जंति तणुं उवणेंति वेअणं णेयताण खयमग्गे ।
अव्वो अइट्ठपुव्वो अणंगबाणाण माहप्पो ॥७४८॥

आमोडऊण बलाउ हत्थं मज्झं गओ सि भो पहिअ ।
हिअआउ जइ अ णीहसि सामत्थं तुज्झ जाणिस्सं ॥७४९॥

सद्धा मे तुज्झ पियत्तणस्स अहयं तु तं ण याणामि ।
दे पसिय तुमं चिय सिक्खवेसु जह ते पिया होमि ॥७५०॥

पेम्मुम्मइयाइ मए उवऊढो हलियउत्तबुद्धीए ।
फंसमि जाव फरुसो तणपुरिसो गामसीमाए ॥७५१॥

बे मग्गा धरणियले माणिणि माणोण्णयाण पुरिसाण ।
अहवा पावंति सिरिं अहव भमंता समप्पंति ॥७५२॥

कत्तो कमलाण रई कत्तो कुमुयाण सीअलो चंदो ।
तह सज्जणाण णेहो ण चलइ दूरट्ठिआणं पि ॥७५३॥

हा हा किं तेण कयं मालइविरहम्मि पुत्ति भसलेणं ।
कंकल्लिकुसुममज्झे जलणो त्ति समप्पिओ अप्पा ॥७५४॥

ढंखरसेसो वि हु महुअरेण मुक्को ण मालईविडवो ।
दरवियसियकलियामोयबहलिमं संभरंतेण ॥७५५॥

समुहागयवोलंतम्मि सा तुमे अघडियंगसंठाणा ।
रुंद वि गामरच्छं णिंदइ तणुअं च अप्पाणं ॥७५६॥

समम् अच्छंति णिअत्तंति पसरिया रणरणंति तद्धियहं ।
चलचित्त तुज्झ लग्गा मणोरहा तीढं हिययम्मि ॥७५७॥

डहिरुण सयलरणं अग्गी समविसमलंघणुव्वायो ।
तडलंबंततणेहि तिसिय व्व णइं समोसरइ ॥७५८॥

स च्चिय रामेउ तुमं पंडिय णिच्चं अलं म्ह रमिएण ।
सब्भावबाहिराई जा जाणइ अट्टमट्टाई ॥७५९॥

रअणायरस्स साहेमि णम्मए अज्ज मुक्कदक्खिण्णा ।
वेडिसलयाहरंतेण मिलिया जं सि पूरेण ॥७६०॥

रक्खइ अणण्णहियओ जीवं पिव महुअरो पयत्तेण ।
दरणेतदीविदाढग्गसच्छहं मालईमउलं ॥७६१॥

तह णेहलालियाण वि अवाहिरिल्लाण सयलकज्जेसु ।
जं कसणं होइ मुहं तं भण्णइ किं पईवाणं ॥७६२॥

तिसिया पियउ त्ति मओ मओ वि तिसिओ मई करेरुण ।
इय मयमिहुणं तिसियं पियइ ण सलिलं सिणेहेण ॥७६३॥

तुह सामलि धवलचलंततरलतिक्खग्गलोयणबलेण ।
मयणो पुणो वि इच्छइ हरेण सह विग्गहारंभं ॥७६४॥

सुहय सुहं चिय कुडलि व्व पेहुणो णिग्गयस्स चडुवस्स ।
जणरंजणिग्गहो ते घरम्मि सुणहो अतिहिवंतो ॥७६५॥

णिवडिहिंसि सुण्णहियए जलहरजलपंकिलम्मि मग्गम्मि ।
उप्पेक्खागयपिययमहत्ये हत्थं पसारेंती ॥७६६॥

उच्छंगियाढं पइणा अहिसारणपंकमलिणपेरंते ।
आसण्णपरियणो विअ सेअ च्चिय धुवइ से पाए ॥७६७॥

जह लंघेसि परवइं निययवइं भरसहं पि मोत्तूणं ।
तह मण्णे कोहलिए अज्जं कल्लं पि फुट्ठिहसि ॥७६८॥

अणुसोयइ हलियबहू रइकिरणोलुग्गपंडुरच्छायं ।
रण्णुदुरदंतुक्खुत्तविसमवलियं तिलच्छेत्तं ॥७६९॥

ओवालअम्मि सीआलुआण वड्मूलम् उल्लिहंताणं ।
दिभाण कलिचयवावडाण सुण्णो जलइ अग्गी ॥७७०॥

मा मा मुय परिहासं देअर अणहोरणा वराई सा ।
सीयम्मि वि पासिज्जइ पुणो वि एसिं कुणसु छायां ॥७७१॥

किं तस्स पारएणं किम् अग्गिणा किं च गब्भहरएण ।
जस्स णिसम्मइ उअरे उण्हायंतत्थणी जाया ॥७७२॥

कमलायराण उण्हो हेमंतो सीअलो जणवयस्स ।
को किर भिण्णसहावं जाणइ परमत्थयं लोए ॥७७३॥

हेम.म्ते हिमरअधूसरस्स ओअसरणस्स पहियस्स ।
सुमारियजायामुहसिज्जिरस्स सीयं चिय पणट्ठं ॥७७४॥

उवइसइ लडियाण कट्ठेइ रसं ण देइ सोत्तुं जे ।
जंतस्स जुव्वणस्स य ण होइ इच्छु च्चिय सहावो ॥७७५॥

बहुएहि जंपिएहिं सिट्ठं अम्ह सवहे करेऊण ।
सद्धो च्चिय से भद्धो भोइणिजंते रसो ण त्थि ॥७७६॥

पढमं चिय माहवपट्टयं व घेत्तूण डाहिणो वाओ ।
अंकोल्लपढमवत्तं पहिंडिओ गामरच्छासु ॥७७७॥

सो माणो पियमुहअंददंसणे कह थिरो धरिज्जिहइ ।
अंकोल्लकोरआण वि जो फुट्टमुहाण बीहेइ ॥७७८॥

कारणगहिओ वि मए माणो एमेअ जं समोसरियो ।
अत्थक्कफुल्ल अंकोल्ल तुज्झ तं मत्थए पडउ ॥७७९॥

रंजेह देह रूवं राएह कुसुमाइ देह विच्छित्तिं ।
ण वि तह पुहवीसस्स वि हलहलओ जह वसंतस्स ॥७८०॥

सिसिरे वणदवडड्ढं वसंतमासम्मि उअह संभूयं ।
मंकुसकण्णसरिच्छं दीसइ पत्तं पलासस्स ॥७८१॥

दूरपइण्णपरिमलं सपल्लवं मुद्धपुप्फपंगुरणं ।
अंगच्छित्तं पिव वम्महेण दिण्णं महुसिरीए ॥७८२॥

कारणगहिअं पि इमा माणं मोएइ माणिणिअणस्स ।
सहयारमंजरी पियसहि व्व कण्णे समल्लीणा ॥७८३॥

अज्जं चिय छणदिअहो मा पुत्ति रुएहि एहइ पिओ त्ति ।
सुण्हं आसासंती पडियत्तमुही रुवइ सासू ॥७८४॥

दियहेदियहे णिवडइ गिहवइधूआणिहेण माउच्छा ।
संगहणइ त्ति वावउ वसुहारा खुज्जसहयारे ॥७८५॥

आउच्छणोवऊहणकंठसमोसरियबाहुलइयाए ।
वलायाइ पहियचलणे बहूँ णियलाइ व पडंति ॥७८६॥

उड्डियपासं तणछण्णकंदरं णिहुअसंठियावक्खं ।

जूहाहिव परिहर मुहमेत्तसरीयं कल ॥७८७॥

गुणसालिणो वि करिणो होहइ जूहाहिवत्तणं कत्तो ।
णवसालिकवललोहिल्लिआएँ विइं मुअंतस्स ॥७८८॥

विहिणा अणुज्जुएणं पुत्तय जाओ कुलम्मि पढमम्मि ।
जाइविसुद्धो भद्धो वि बंधणं पावइ खणम्मि ॥७८९॥

चउपासदिण्णहुयवहविसमाह हवेढणापिउलं ।
णिव्वाहेउ जाणइ जूहं जूहाहिवो च्चेव ॥७९०॥

अल्लग्गकवोलेण वि गयमइणा पत्तदसावसणम्मि ।
अज्ज वि माएँ सणाहं गयवइजूहं धरंतेण ॥७९१॥

ण वि तह दूमेइ मणं गयस्स बंधो वि करिणिविरहो वि ।
दाणविओयविमुहिए जह भमरउले भमंतम्मि ॥७९२॥

गामम्मि मोहणाइं दिण्णे खग्गे व्व चोरहित्थाइं ।
गहवइणो णामेणं कियाइ अण्णेण वि जणेण ॥७९३॥

मलिणाइं अंगाइं बाहिरलोएण मंसलुद्धेण ।
हिययं हियएण विणा ण देइ वाही भमइ हट्टं ॥७९४॥

कढिणखरवीरपेल्लणहलं व पत्थरविणिग्गयग्गिकणे ।
धचलोआयरियवहे कसरा वि सुहेण वच्चंति ॥७९५॥

णक्खमऊहेसु खणं कुसुमेसु खणं खणं किसलएसु ।
हत्थेसु खणं कुसुमोच्चियाइ लोडाविया भसला ॥७९६॥

छेत्तम्मि जेण रमिया ताओ किर तस्स चेय मंदेइ ।
जइ तीअ इमं णिसुयं फुट्टइ हिययं हरिसयाए ॥७९७॥

हिययं णियामि कढिणं पा हासेण घडियं मे ।
विरहाणलेण तत्तं रससित्तं अंतिता फुडह ॥७९८॥

अण्णे ते किल सिहिणो सिणरससेएण हुंति विच्छाया ।
आसाइयरससेओ होइ विसेसेण णेहजो दहणो ॥७९९॥

अंतो णिभुअट्ठिअपरिअणाइ ओरुद्धदारणअणाइ ।
गिम्हे घोरट्टघग्घररवेण घोरंति व घरट्ट ॥८००॥





जीहाइ परं लिब्भइ दंतोद्वेणं ण तीरए गहिउं ।
अहरो व्व सव्वणो गोहणेण पढमो तणुच्छेओ ॥८०१॥

जह वेल्लीहि ण माअसि जह इच्छसि परवइं पि लंघेउं ।
तह पूर्णं कोहलिए अज्जं कल्लिं व फुल्लिहिंसि ॥८०२॥

विलासणिगुरुणिअं वो तीरउ चलणेहि दोहि उव्वहिउं ।
एआई उण मज्झो थणभारं कइ णु उव्वहि ॥८०३॥

वारिज्जंती णवकोमुइ त्ति मा पुत्ति अंगणे सुवसु ।
मा ते अंवुपिसाओ चंदो त्ति मुहं गसिज्जिहिइ ॥८०४॥

सुव्वंतो आसि परंपराइ कहकह वि दिट्ठिमिलिओ ऽसि ।
दे सुहअ कि पि जंपसु पिअंतु कण्णाइ मे अमिअं ॥८०५॥

विरहकिसिआ वराई दिणाइ आसण्णगिम्हपरिणामाई ।
कढिणहिअओ पवासी ण आणिमो कह समप्पिहिइ ॥८०६॥

रोआविअ म्हा माए अंगणपहिएण दरपसुत्तेण ।
परिवत्तसु माणिणि माणिणि त्ति सिविणे भणंतेण ॥८०७॥

माणंसिणीअ पइणा णअणकवोलाहरप्पहाभिण्णा ।
उज्जुअसुरचावणिहा वाहोआरा चिरं दिट्ठा ॥८०८॥

सरहसविणिग्गाआइ वि इच्छाइ तुमं ण तीअ सच्चविओ ।
सीसाहअवलिअभुअंगवकरच्छे हअग्गामे ॥८०९॥

सा तुह विरहे णिक्किव संधारिज्जइ सहीहि णिउणाहि ।
चंडालहत्थगअसउणिअ व्व जीए गिरालंवा ॥८१०॥

कप्पासं कुप्पासंतरम्मि तइ खित्तम् इत्ति भणिऊण ।
अत्ता वला ऽहिरेणं थणाण मह कारिआ ऽवत्था ॥८११॥

गाईउ पंचखारिंभरीउ चत्तारि पक्कलवइल्ला ।
संपण्णं वालावल्लरअं सेवा सिवं कुणउ ॥८१२॥

अणुराअरअणभरिअं कंचणकलस व्व तरुणिथणवट्टं ।
तस्स चिअ मुहम्मि किआ मसिमुद्दा मअणराएण ॥८१३॥

विज्ज पिआसा वहलइ घणताओ खणखणम्मि रोमंचो ।
हिअए ण भाइ अण्णं लज्जापत्थेहि तेजिआ पाणा ॥८१४॥

गाहाण अ गेआण अ तन्तीसद्वाण पोढमहिलाण ।
ताणं सो च्चिअ दण्डो जे ताण रसं ण आणंति ॥८१५॥

विवरीअरअम्मि सिरी बम्हं दट्ठुण णाहिकमलत्थं ।
हरिणो दाहिणअणं रसाउला झैत्ति ढक्केइ ॥८१६॥

लडहविलआण लोअणकडक्खविवक्खेवजणिअसंदावा ।
झिज्जंति महासत्ता चित्तुवेअणसहा होंति ॥८१७॥

तह हस जह ण हसिज्जसि तह जंप जहा परप्पिअं होइ ।
तह जिअ जह लहसि जसं तह मर जह ण उण संभवसि ॥८१८॥

छप्पअ गम्मसु सिसिरं पासाकुसुमेहि ताव मा मरसु ।
जीअंतो दच्छिहिसि अ पुणो वि रिद्धि वसंतस्स ॥८१९॥

सव्वत्थ होइ ठाणं रासहमहिसाण मेसवुसहाणं ।
भद्दगईदाणम् अहो महावणम् अहव महाराओ ॥८२०॥

अव्वो ण आमि छेत्तं खज्जउ साली वि कीरणिवहेहिं ।
जाणंता अवि पहिआ पुच्छंति पुणोपुणो मग्गं ॥८२१॥

अत्थक्कागअदिट्ठे वहुआ जामादुअम्मि गुरुपुरओ ।
जूरइ णिवडंताणं हरिसविफंदंतवलआणं ॥८२२॥

अच्छीहि तुज्झ सुंदरि बाहिरधवलेहि मज्झकसणेहि ।
एएहि को ण दमिओ पिसुणेहि व कण्णलग्गेहि ॥८२३॥

एह इमीअ णिअच्छह विम्भिअहिअआ सही पुलोएइ ।
अद्दाअम्मि कवोलं कवोलपट्टम्मि अद्दाअं ॥८२४॥

कइआ जाआ कइआ णु सिक्खिआ माइआ हअकुमारी ।
तंतं जाणइ सव्वं जंजं महिलाओ जाणंति ॥८२५॥

खणपिट्ठूसरत्थणि महुमअतंबच्छि कुवलआभरणे ।
कण्णगअचूअमंजरि पुत्ति तुए मंडिओ गामो ॥८२६॥

मग्गिअलद्धे बलमोडिचुंबिए अप्पणेण उवणीदे ।
एक्कम्मि पिआअहरे अण्णण्णा होंति रसहेआ ॥८२७॥

उप्फुल्ललोअणेणं कवोलबोसट्टमाणसेएणं ।
अहणंतेण वि भणिआ मुहेण से कज्जणिव्वुत्ती ॥८२८॥

जत्थ ण उज्जागरओ जत्थ ण ईसा विसूरणं माणो ।
सव्भावचाडुअं जत्थ ण त्थि णेहो तहिं ण त्थि ॥८२९॥

मह पइणा थणजुअले पत्तं लिहिअं ति गव्विआ कीस ।
आलिहइ महं पि पिओ जइ से कंपो च्चिअ ण होइ ॥८३०॥

कण्णे पडिअं हिअए पडिअं चिअ ओ मए अभव्वाए ।
जामि त्ति तुज्झ वअणं किं व ण सहिअं पवासस्स ॥८३१॥

समपंथपत्थिअस्स वि पहिअस्स खलंति पुढमदिअहम्मि ।
हिअअट्ठिअजाआगुरुणिअंवहारेण व पआइ ॥८३२॥

संदेसो वि ण लिहिओ लेहे पहिएण कत्थ घरतत्ती ।
अणवरअलिहिअगेहिणिगोत्तक्खरपूरिए पत्ते ॥८३३॥

उप्पेक्खागअदइअंगसंगमुच्चलिअविउणसेआए ।

बोलीणो वि ण णाओ पउत्थपइआइ हेमंतो ॥८३४॥

सिविणअलद्धपिअअमपुलइउग्गमणिब्भरेहि अंगेहिं ।
परिरंभणे सुहाइं पावउ मा णं पबोहेह ॥८३५॥

विज्झावेइ पइवं अब्भुदुंतीं प्हिअजाआए ।
पिअअमविओअदीहरणीसहणीसासरिंछोली ॥८३६॥

जं पीअं मंगलवासणां पत्थाणपढमदिअहम्मि ।
बाहसलिलं ण चिट्ठइ तं चिअ विरहे रुवंतीए ॥८३७॥

उक्कंठाणिच्छाआ सव्वं उण परिअणं रुआवेइ ।
आअंबिरेहि अज्झा फुसिअपरुण्णेहि अच्छीहि ॥८३८॥

जह दिअहविरामो णवसिरीसगंधुद्धुराणिलग्घविओ ।
प्हिअघरिणीअ ण तहा तवेइ तिव्वा वि मज्झण्हो ॥८३९॥

चिरपवसिअदइअकहा णिउणाहि सहीहि विरहसहणत्थं ।
अलिआ अवि अवराहा वहुं कमसो कहिज्जति ॥८४०॥

जंजं पउत्थपइआ पिअअमणामक्खरं लिहइ लेहे ।
तंतं तल्लेहणिआणुसारगलिओ पुसइ सेओ ॥८४१॥

अच्छउ णिमीलिअच्छी मा मा वारेह पिअअमासाए ।
तेण विणा किं पेच्छउ उम्मिल्लेहिं वि अच्छीहिं ॥८४२॥

दीहुण्हा णीसासा रणरणओ रुज्जगग्गिरं गेअं ।
पिअविरहे जीविअवल्लहाण एसो च्चिअ विणोओ ॥८४३॥

जइ देव तुं पसण्णो मा करिहिसि मज्झ माणुसं जम्मं ।
जइ जम्मं मा पेम्मं जइ पेम्मं मा जणे दुलहे ॥८४४॥

राईण भणइ लोओ जा किल गिम्हम्मि होंति मडहाओ ।
मह उण दइएण विणा ण आणिमो कीस वड्ढति ॥८४५॥

एक्के अअणे दिअहा वीए रअणीं होंति दीहाओ ।
विरहाअणो अपुव्वो एत्थ दुवे च्चेअ वड्ढति ॥८४६॥

चिरजीवित्तणकंखिरि मा तम्म रसाअणेहि अथिरेहि ।
विरहं पवज्ज जाअंति जेण जुअदीहरा दिअहा ॥८४७॥

रुअइ रुअंतीं मए ओहिदिणे गणइ झिज्जइ अहं व ।
पिअविरहे मामि सअज्झिआं गेहो च्चिअ अपुव्वो ॥८४८॥

कंठग्गहणेण सअज्झिआं अब्भगओवआरेण ।
वहुआं पइम्मि वि आगअम्मि सामं मुहं जाअं ॥८४९॥

चंदो वि चंदवअणे मुणालबाहालए मुणालाइं ।
इंदीवराइ इंदीवरच्छि तावेंति तुह विरहे ॥८५०॥

गुरुअणपरवस पिअ किं भणामि तुह मंदभाइणी अहअं ।
अज्ज पवासं वज्जसि वच्च सअं च्चेअ मुणसि करणिज्जं ॥८५१॥

वित्थिण्णं महिवेढं विउलणिअंबाँ पीणथणिआओ ।
लब्भंति विसालच्छीँ सुहअ जुवईँ मा तम्म ॥८५२॥

कज्जं विणा वि विअलंतपेम्मराअं तुमं णिअच्छंती ।
हिअआसंकिअणिअदोसदुम्मणा तामइ वराई ॥८५३॥

दूई ण एइ चंदो वि उग्गओ जामिणी वि बोलेइ ।
सव्वं सव्वत्थो च्चिअ विसंतुलं कस्स किं भणिमो ॥८५४॥

दूई गआ चिराअइ किं सो मह पासम् एहिइ ण वे ऽत्ति ।
जीविअमरणंतरसंठिआहे अंदोलए हिअअं ॥८५५॥

सो णा ऽगओ त्ति पेच्छह परिहासुल्लाविरीहे दूईए ।
णूमंतीअ पहरिसो ओसट्टइ गंडपासेसु ॥८५६॥

कह णु गआ कह दिट्ठो किं भणिअं किं व तेण पडिभणिअं ।
एअं चिअ ण समप्पइ पुणरुत्तं जंपमाणीए ॥८५७॥

दूईमुहअंदपुलोइरीहे किं भणिहिइ त्ति अज्झाए ।
पिअसंगमललिअमणोरहाहे हिअअं थरथरेइ ॥८५८॥

अप्पाहिआइ तुह तेण जाइ ताइं मए ण मुणिआइ ।
अच्चुणहस्सासपरिक्खलंतविसमक्खरपआइं ॥८५९॥

साहेंती सहि सुहअं खणेखणे दूमिआ सि मज्झ कए ।
सव्वभावणेहकरणिज्जसरिसअं दाव विरइअं तुमए ॥८६०॥

जं तुह कज्जं तं चिअ कज्जं मज्झ त्ति जं सआ भणसि ।
ओ दूइ सच्चवअणे अज्ज सि पारं गआ तस्स ॥८६१॥

णवलअपहरुत्तथाहे तं कअं हलिअवहुआए ।
जं अज्ज वि जुवइजणो घरेघरे सिक्खिउं महइ ॥८६२॥

धण्णो सि रे हलिइअ हलिअसुआपीणथणभरुच्छंगे ।
पेच्छंतस्स वि पइणो जह तुह कुसुमाइ णिवडंति ॥८६३॥

सच्चं चिअ कट्ठमओ सुरणाहो जेण हलिअधूआए ।
हत्थेहि कमलदलकोमलेहि चिक्को ण पल्लविओ ॥८६४॥

एमेअ अकअपुण्णा अप्पत्तमणोरहा विवज्जिस्सं ।
जणवाओ वि ण जाओ तेण समं हलिउत्तेण ॥८६५॥

लज्जापज्जत्तपसाहणाइ परतत्तिणिप्पिवासाइं ।
अविणअदिमोहाइं धण्णाण घरे कलत्ताइं ॥८६६॥

हसिअम् अविआरमुद्धं भमिअं विरहिअविलाससच्छाअं ।
भणिअं सहावसरलं धण्णाण घरे कलत्ताणं ॥८६७॥

पइणा वण्णिज्जंतं अक्खाणअसुंदरीहे रूवम्मि ।
ईसामच्छरगरुअं घरिणी हुंकारअं देइ ॥८६८॥

वाहिज्जंति ण कस्स वि रोत्तूणं णेअ पाअडिज्जंति ।
माणविआरा कुलपालिआहं हिअए विलावेंति ॥८६९॥

अहिअं सुण्णाइ णिरंजणाइ वइरिक्करुण्णपुसिआइ ।
विरहुक्कंठं कुलपालिआइ साहंति अच्छीइं ॥८७०॥

कुलपालिआहं पेच्छह जोव्वणलाअण्णविब्भमविलासा ।
पवसंति व्व पवसिए एंति व्व पिए घरं एंते ॥८७१॥

पइपुरओ च्चिअ रभसेण चुंबिओ देवरो अडअणाए ।
मह वअणं मइरागंधिअं ति हाआ तुहं भणइ ॥८७२॥

तह अडअणाहं रुण्णं पइमरणे बाहरुद्धकंठीए ।
अणुमरणसंकिणो जह जारस्स वि संकिअं हिअअं ॥८७३॥

वाणीरकुडुंगुट्ठीणसउणिकोलाहलं सुणंतीए ।
घरकम्मवावुडाए वहुहं सीअंति अंगाइं ॥८७४॥

णोल्लेइ अणोल्लमणा अत्ता मं घरभरम्मि सअलम्मि ।
खणमेत्तं जह संझाहं णवर ण व होइ वीसामो ॥८७५॥

ठाणेठाणे वलिआ वलणेवलणे सवेडसकुडुंगा ।
ण गओ सि अम्ह गामं दिअर ण दिट्ठा तुए मुरला ॥८७६॥

महुएहि किं व वालअ हरसि णिअंबाहि जइ वि मे सिअअं ।
साहामि कस्स रण्णे दूरे गामो अहं एक्का ॥८७७॥

कालक्खरदूसिक्खिअ धम्मिअ रे णिंबकीडअसरिच्छ ।
दोण्ण वि णिरअणिवासो समअं जइ होइ तहि होदु ॥८७८॥

पंथअ ण एत्थ संथरम् अत्थि मणं पत्थरत्थले गामे ।
उण्णअपअहरे पेक्खिऊण जइ वससि ता वससु ॥८७९॥

विहलक्खणं तुमं सहि दट्ठुण कुडेण तरलतरदिट्ठिं ।
वारप्फंसणिहेण अ अप्पागरुओ त्ति पाडिअविहिण्णो ॥८८०॥

अइविउलं जलकुंभं घेतूण समागअ म्हि सहि तुरिअं ।
समसेअसलिलणीसासणीसहा वीसमामि खणं ॥८८१॥

अणुमरणे हसइ जणो रोत्तुं वि ण लब्भइ जहेच्छं ।
ता एत्थ किं करिस्सं चोरिअरमणे विवज्जंते ॥८८२॥

मा पुत्ति वंकभणिअं जंपसु पुरओ तुमं छउल्लाणं ।
हिअएण जं च भणिअं तं पि हआसा विआणंति ॥८८३॥

वंकभणिआइ कत्तो कत्तो अद्धच्छिपेच्छिअव्वाइ ।
ऊससिउं पि ण तीरइ छउल्लपरिवारिए गामे ॥८८४॥

तत्थ वि होंति सहीओ पुत्तलि मा रुवसु जत्थ दिण्णा सि ।
तत्थ वि णिउंजलीला तत्थ वि गिरिवाहिणी गोला ॥८८५॥

कस्स व ण होइ रोसो दट्ठुण पिआहं सव्वणं अहरं ।

सभमरकमलग्घाइरि वारिअवामे सहसु एण्हिं ॥८८६॥

छप्पत्तिआ वि खज्जइ णिप्पत्ते पुत्ति एत्थ को दोसो ।
णिअपुरिसे वि रमिज्जइ परपुरिसविवज्जिए गामे ॥८८७॥

अमुणिअपरपुरिससुहो जंपउ जं किं पि अण्णओ लोओ ।
णिअपुरिसेहि वि अम्हे परपुरिसो त्ति च्चिअ रमामो ॥८८८॥

माए घोवअरणं अज्ज खु ण त्थि त्ति साहिअं तुमए ।
ता भण किं करणिज्जं एमैअ ण वासरो ठाइ ॥८८९॥

सच्छंदरमणदंसणसंवट्ठिअगरुअवम्महविलासं ।
सुविअट्ठवेसविलआरमिअं को वण्णिउं तरइ ॥८९०॥

सामण्णसुंदरीणं विब्भमम् आवहइ अविणओ च्चेअ ।
धूमो वि हु पज्जलिआणं महुरो होइ सुरभिदारूणं ॥८९१॥

अव्वो कालस्स गई सो वि जुआ सरसकव्वदुल्ललिओ ।
पढइ परासरसइं अम्हे वि णिअं पइं गमिमो ॥८९२॥

पणमह माणस्स हला चलणे किं देवएहि अण्णेहिं ।
जस्स पसाएण पिओ घोलइ पाअंतपासेसु ॥८९३॥

अणुणअपसरं पाअपडनूसवं रभसचुंबणसुहेल्लिं ।
एआइ अ अण्णाइ अ अवसो व्व कओ फलइ माणो ॥८९४॥

जइ पुत्तलि बहुएहिं अणुणअसोक्खेहि अत्थि दे कज्जं ।
ताव रुअ गेण्ह माणं खणमेत्तं तम्मि सुहअम्मि ॥८९५॥

आणा अणालवंतीँ कीरए दीसए पराहुत्तो ।
णिंतम्मि णीसिसिज्जइ पुत्ति अपुव्वोक्खु दे माणो ॥८९६॥

जंजं भणह सहीओ आम करिस्साम सव्वहा तंतं ।
जइ तरह रुंभिउं मह धीरं समुहागए तम्मि ॥८९७॥

अल्लिअइ दिट्ठिणिब्भच्छिओ वि विहुओ वि लग्गए सिअए ।
पहओ वि चुंबइ बला अलज्जए कह णु कुप्पिस्सं ॥८९८॥

हिमजोअचुण्णहत्थाँ जस्स दप्पं कुणंति राईओ ।
कह तस्स पिअस्स मए तीरइ माणो हला काउं ॥८९९॥

किं भणह मं सहीओ करेहि माणं ति किं थ माणेण ।
सब्भाववाहिरे तम्मि मज्झ माणेण वि ण कज्जं ॥९००॥





जइआ पिओ ण दीसइ भणह हला कस्स कीरए माणो ।
अह दिट्ठम्मि वि माणो ता तस्स पिअत्तणं कत्तो ॥९०१॥

जाणिमि कआवराहं जाणिमि अलिआइ भणइ सअलाइ ।
अणुणेंते उण जाणे कआवराहं व अप्पाणं ॥९०२॥

अवराहसहस्साइं भरिमो हिअएण तम्मि अदिट्ठे ।
दिट्ठम्मि उण पिअसही एक्कं पि हु णं ण संभरिमो ॥९०३॥

भणभण जंजं पडिहाइ तुज्झ तंतं सहामिमो अम्हे ।
असहत्तणं च जीअं च वल्लभे दोइ ण घडंति ॥९०४॥

एअं चिअ मह णामं भणभण दे सुहअ किं विलक्खो सि ।
पडिहाइ जं ण तुज्झ वि ममं पि किं देण णामेण ॥९०५॥

सुहअ मुहुत्तं सुप्पउ जं ते पडिहाइ तं पि भण्णिहिं सि ।
अज्ज ण पेच्छति तुहं णिद्वागरुआइ अच्छीइ ॥९०६॥

मा वेलवेसु बहुअं पुत्तअ अलिएहि गोत्तेहिं ।
एसा वि जाणइ च्चिअ परिहासुम्मिस्सभणिआइं ॥९०७॥

अइ चंडि किं ण पेच्छसि जइ सो वाहरइ अण्णगोत्तेण ।
अह दे इच्छइ मच्छरपणच्चिअच्छं मुहं दट्ठुं ॥९०८॥

वेआरिज्जसि मुद्धे गोत्तक्खलिएहि मा खु तुं रुवसु ।
किं व ण पेच्छइ अण्णह एद्धमेत्तेहि अच्छीहिं ॥९०९॥

सोत्तुं सुहं ण लब्भइ अब्बो पेम्मस्स वंक्कविसमस्स ।
दुग्घडिअमंचअस्स व खणेखणे पाअपडणेण ॥९१०॥

एक्कसअणम्मि सुमुही विमुही गरुएण माणबंधेण ।
सिंविणकलहम्मि होती परम्मही सम्मुही जाआ ॥९११॥

वट्ठउ ता तुह गव्वो भण्णसि रे जइ विहंडणं वअणं ।
सच्चं ण एइ णिद्वा तुए विणा देहि ओआसं ॥९१२॥

कअविच्छेओ सहिभंगिभणिअसब्भाविआवराहाए ।
झडि आपल्लवइ पुणो णअणकवोलेसु कोवतरू ॥९१३॥

उम्मूलंति व हिअअं अणुणिज्जंतीं माणवंतीओ ।
संभरिअमण्णुणिब्भरबाहभरोरुभिअमुहीओ ॥९१४॥

ण वि तह तक्खणसुअमण्णुदुक्खविअणां वि रुवंति ।
जह दिट्ठम्मि पिअअमे अणुणिज्जंतीं तरुणीं ॥९१५॥

हिअए रोसुक्खित्तं पाअपहारं सिरिण पत्थंतो ।
ण हओ दइओ माणंसिणीं थोरंसुअं रुण्णं ॥९१६॥

पिअमविइणचसअं अचक्खिअं पिअसहीहं देतीए ।
अभणंतीहं वि माणंसिणीहं कहिओ च्चिअ विरोहो ॥११७॥

वच्चिहिइ स घरं से लहिहिइ ओआसम् एहिइ सआसं ।
भणिहिइ जं भणिअव्वं पच्चुत्तं किंणु पाविहिइ ॥११८॥

तणुआइआ वराई दिअहेदिअहे मिअंकलेह व्व ।
बहलपओसेण तुए णिसंस अंधारिअमुहेण ॥११९॥

दावतेण तुह मुहं भुमआभंगम्मि होंतणवसोहं ।
अकएण उवकअं अज्ज मण्णुणा मज्झ पसिअच्छि ॥१२०॥

भिउडी ण कआ कडुअं णा ऽलविअं अहरअं ण पज्जुट्ठं ।
उवऊहिआ ण रुण्णा एएण वि जाणिमो माणं ॥१२१॥

किं पि ण जंपसि कामं भणिअं च करेसि तं तहा तुरिअं ।
हिअअं रोसुव्वेअं ति तुज्झ विणओ च्चिअ कहेइ ॥१२२॥

परिपुच्छिआ ण जंपसि चुंभिज्जंती बला मुहं हरसि ।
परिहासमाणविमुहे पसिअच्छि मणं म्ह दूमेसि ॥१२३॥

अइ पीणत्थणउत्थंभिआणणे सुअणु सुणसु मह वअणं ।
अथिरम्मि जुज्जइ ण जोव्वणम्मि माणो पिए कादुं ॥१२४॥

तरलच्छि चंदवअणे थोरत्थणि करिअरोरु तणुमज्झे ।
दीहा ण समप्पइ सिसिरजामिणी कह णु दे माणो ॥१२५॥

सुहआ वि सुंडरी वि हु तरुणी वि हु माणिणि त्ति आ पुत्ति ।
चंदणलट्ठि व्व हुअंगदूमिआ किं डु दूमेसि ॥१२६॥

पडिवक्खस्स वि पुरओ समुहं भणिआ सि तेण पसिअ त्ति ।
अवलंबिअस्स माणिणि माणस्स अ किं फलं अण्णं ॥१२७॥

कट्ठेसि चलिअवलए हत्थे मुंघेसि अहमुही बाहं ।
पडिरुभसि णीसासे बहुअं ते माणविण्णाणं ॥१२८॥

कज्जं विणा वि कअमाणडंबरा पुलअभिण्णसव्वंगी ।
उज्जल्लालिंगणसोक्खलालसा पुत्ति मुणिआ सि ॥१२९॥

हंहो किं व ण दिट्ठं हला मए जीविअं धरंतीए ।
सो मं अणुणेइ पिओ अहं पि अणुणिज्जिमि हआसा ॥१३०॥

ता सोक्खं ताव रई ता रणरणअस्स ण त्थि ओआसो ।
जा दुक्खेक्कणिहाणे ण होइ बहुवल्लहे पेम्मं ॥१३१॥

माणहरिएहि गंतुं ण तीरए सो णएइ अवराही ।
को वि अपत्थिअमुणिओ णेज्जं मंतं व आणेज्ज ॥१३२॥

उव्वहइ दइअगहिआ हरोट्ठिज्जंतकोवगअराअं ।
पाणोसरंतमइरं व फलिहचसअं मुहं बाला ॥१३३॥

गाढालिंगणरभसुज्जअम्मि दइए लहुं समोसरइ ।

माणंसिणीहं माणो फेल्लणभीओ व्व हिअआहि ॥९३४॥

तुंगो थिरो विसालो जो सहि मे माणपव्वओ रडओ ।
सो दइअदिट्ठिवज्जासणीहं घाए विण पहुंतो ॥९३५॥

सहि विरडुण माणस्स मज्झ धीरत्तणेण ओआसं ।
पिअअमदंसणविहलक्खणम्मि सहसे ऽत्ति तेण ओसरिअं ॥९३६॥

णहपअपसाहिअंगो णिद्वाघुम्मंतलोअणो ण तहा ।
जह णिव्वणाहरो सामलंग दूमेसि मह हिअअं ॥९३७॥

पच्चक्खमंतुकारअ जइ चुंबसि मे इमे हअकवोले ।
ता मज्झ पिअसहीए विसेसओ कीस तण्हाओ ॥९३८॥

तइआ मह गंडत्थलणिमिअं दिट्ठिं ण णेसि अण्णत्तो ।
एणिहं स च्चेअ अहं ते अ कवोला ण सा दिट्ठी ॥९३९॥

ताण गुणग्गहणाणं ताण्ऽ उक्कंठाण तस्स पेम्मस्स ।
ताण भणिआण सुंदर ईरिसअं जाअम् अवसाणं ॥९४०॥

अलिअकुविअं पि कअमंतुअं व मं जेसु सुहअ अणुणेंतो ।
ताण दिअहाण हरणे रुआमि ण उणो अहं कुविआ ॥९४१॥

आम तुह णा ऽवराहो पिअअम मे लोअणाण इह दोसो ।
माणासहम्मि चडुलेहि वासिओ जेहि हिअअम्मि ॥९४२॥

को सुहअ तुज्झ दोसो हअहिअअं णिट्ठरं मज्झ ।
पेच्छसि अणिमिसणअणो जंपसि विणेंअं ण जंपसे पिट्ठं ॥९४३॥

वच्च मह च्चिअ एक्काहं होंतु णीसासरोइअव्वाइ ।
मा तुज्झ वि तीहं विणा दक्खिण्णहअस्स जाणीअंतु ॥९४४॥

अणुवत्तंतो अम्हारिसं जणं आहिजाईए ।
चित्तैसि उणो हिअए अणाहिजाई सुहं जअइ ॥९४५॥

हुं णिल्लज्ज समोसर तं चिअ अणुणेसु जीहं दे एअं ।
पाअंगुल्लालत्तअरसेण तिलअं विणिम्मविअं ॥९४६॥

सा वसइ तुज्झ हिअए स च्चिअ अच्छीसु सा अ सिविणेसु ।
अम्हारिसाण सुंदर ओआसो कत्थ पावाण ॥९४७॥

तण्हा मे तुज्झ पिअत्तणस्स कह तं ति णो हि जाणामो ।
दे सुहअ तुमं चिअ सिक्खवेसु जह दे पिआ होमि ॥९४८॥

मलिणवसणाण किअवणिआणं आपंडुगंडपालीणं ।
पुप्फवइआण कामो अंगेसु कआउहो वसइ ॥९४९॥

पुप्फवइअ म्हि बालअ मा चिवसु अदीहराउसो होसि ।
अज्जं चेअ मरिज्जउ मअच्छि किं कालहरणेण ॥९५०॥

वाणिअअ हत्थिदंता कत्तो अम्हाण वग्घकत्तीओ ।
जाव लुलिआलअमुही घरम्मि परिसक्कए सोणहा ॥९५१॥

गण्हंति पिअअमाण वअणाहि हंसी० विसलअद्धाड ।
हिअआइ व कुसुमाउहबाणकआणेअरंधाड ॥९५२॥

हंसाण सरेहि सिरी सारिज्जइ अह सराण हंसेहि ।
अण्णोण्णं चिअ एए अप्पाणं णवर गरुअंति ॥९५३॥

अणुदिअहकआभोआ जहजह थणआ विणिंति कुमरीए ।
तहतह लद्धोआसो व्व वम्महो हिअअम् आविसइ ॥९५४॥

केसा पंडुरछाआ असईसंगेण चम्म जज्जरिअं ।
चित्तं तुह सोहग्गं गोदा दूइत्तणं कुणइ ॥९५५॥

णिण्णिदं दोब्बल्लं चिंता अलसत्तणं सणीससिअं ।
मह मंदभाइणीए कए सहि तुमं वि अहह परिभवइ ॥९५६॥

णिअदइअदंसणूसुअ पंथिअ अण्णेण वच्चसु पहेण ।
घरवइधूआ दुल्लं घवाउरा ठाइ हअगामे ॥९५७॥

आसाइअं अण्णाएण जेत्तिअं ता तुइ ण बहुआ धिई ।
उवरमसु वुसह एण्हें रक्खिज्जइ गेहवइखेत्तं ॥९५८॥

उच्चिणसु पडिअकुसुमं मा धुण सेहालिअं हलिअसुण्हे ।
एस अवसाणविरसो ससुरेण सुओ वलअसदो ॥९५९॥

पविसंती घरदारं विवलिअवअणा विलोइऊण पंहं ।
खंधे मौत्तूण घडं हाहा णट्ठो त्ति रुअसि सहि किं ति ॥९६०॥

मा पंथ रुंधसु पहम् अबेहि बालअ असेसिअहिरीअ ।
अम्हे अणिरिक्काओ सुण्णं घरअं व अक्कमसि ॥९६१॥

सुव्वइ समागमिस्सइ तुज्झ पिओ अज्ज पहरमेत्तेण ।
एमअ किं पि चिट्ठसि ता सहि सज्जेसु करणिज्जं ॥९६२॥

खणपाहुणिआ देअरजाया ए सुहय किं ते दे हणिदा ।
रुअइ घोपंतफलिणिघरम्मि अणुणिज्जउ वराई ॥९६३॥

पुप्फभरोणमिअभूमिगअसाहतूरुण विण्णवणं ।
गोलाअडविअडकुडुंगमहुअ... ॥९६४॥

गृहिणिप्रवेशितजारे गृहे गृहे (गृहिणी) स्थापिता ।
मिलितावदति(असती?)जारौ पश्चाद् गृहिणी गृहस्थश् च ॥९६५॥

एक्कत्तो रुअइ पिआ अण्णत्तो समरतूरुणिघोसो ।
पेम्मेण रणरसेण अ भडस्स डोलाइअं हिअअं ॥९६६॥

केलीगोत्तक्खलणे विकुप्पए केअवं अआणंती ।
दुट्ठ उअसु परिहासं जाआ सच्चं चिअ परुण्णा ॥९६७॥

दे आ पसिअ णिअत्तसु मुहससिजोण्हाविलुत्ततमणिवहे ।
अहिसारिआण विग्घं करेसि अण्णाण वि हआसे ॥९६८॥

अण्णं लहुअत्तणअं अण्ण च्चिअ काइ वत्तणच्छाआ ।
सामा सामण्णपआवइणो रेह च्चिअ ण होइ ॥९६९॥

अलससिरोमणि धुत्ताण अग्गिमो पुत्ति धणसमिद्धिमओ ।
इअ भणिएण णअंगी पप्फुल्लविलोअणा जाआ ॥९७०॥

उल्लोल्लकरअरअणक्खएहि तुह लोअणेसु मह दिण्णं ।
रत्तंसुअं पसाओ कोवेण पुणो इमे ण अक्कमिआ ॥९७१॥

ए एहि दाव सुंदरि कण्णं दाऊण सुणसु वअणिज्जं ।
तुज्झ मुहेण किसोअरि चंदो उअमिज्जइ जणेण ॥९७२॥

एद्वहमेत्तत्थणिआ एद्वहमेत्तेहि अच्छिवत्तेहिं ।
एद्वहमेत्तावत्था एद्वहमेत्तेहि दिअहेहिं ॥९७३॥

करजुअगहिअजसोआथणमुहविणिवेसिआहरपुडस्स ।
संभरिअपंचजण्णस्स णमह कण्हस्स रोमंचं ॥९७४॥

का विसमा देव्वगई किं दुल्लब्भं जणो गुणग्गाही ।
किं सोक्खं सुकलत्तं किं दुक्खं जं खलो लोओ ॥९७५॥

किवणाण धणं णाआण फणमणी केसराइ सीहाणं ।
कुलवालिआण अ थणा कत्तो झिय्यंति अमुआणं ॥९७६॥

केसेसु वलामोडिअ तेण समरम्मि जअस्सिरी गहिआ ।
जह कंदराहि विहुरा तस्स दढं कंठअम्मि संठविआ ॥९७७॥

खलववहारा दीसंति दारुणा जह वि तह वि धीराणं ।
हिअअवअस्सवहुमआ ण हु ववसाआ विमुज्झंति ॥९७८॥

जं परिहरिउं तीरइ मणं पि ण सुंदरअत्तणगुणेण ।
अह णवरम् अस्स दोसो पडिवच्छेहिं पि पडिवण्णो ॥९७९॥

जस्स रणंतेउरए करे कुणंतस्स मंडलगलअं ।
रससम्मूही वि सहसा परम्मूही होइ रिउसेणा ॥९८०॥

जस्सेअ वणो तस्सेअ वेअणा भणइ तं जणो अलिअं ।
दंतक्खअं कवोले वहुं विअणा सवत्तीणं ॥९८१॥

जहा गहिरो जहा रअणणिब्भरो जह अ णिम्मलच्छाओ ।
तह किं विहिणा एसो सबाणिओ जलणिही ण किओ ॥९८२॥

जा ठेरं व हसंती कइवअणंवुरुहवद्धविणिवेसा ।
दावेइ भुअणमंडलम् अण्णं विअ (चिअ?) जअइ सा वाणी ॥९८३॥

जोण्हाइ महुरसेण अ विइण्णतारुण्णउच्छुअमणा सा ।
वुद्धा वि णवोढ व्व परवहू अह हरइ तुह हिअअं ॥९८४॥

टुंढुण्णंतो मरिहिसि कंटअकलिआइ केअइवणाइं ।
मालइकुसुमसरिच्छं भमर भमंतो ण पाविहिसि ॥९८५॥

णवपुण्णिमामिअंकस्स सुहअ को तं सि भणसु मह सच्चं ।

का सोहगसमग्गा पओसरअणि व्व तुह अज्ज ॥९८६॥

णिहुअरमणम्मि लोअणपहम्मि पडिए गुरुअणमज्झम्मि ।
सअलपरिहारहिअआ वणगमणं चेअ महइ वहु ॥९८७॥

तं ताण सिरिसहोअरअणाहरणम्मि हिअअम् एक्करसं ।
विवाहरे पिआणं णिवेसिअं कुसुमवाणेण ॥९८८॥

ताला जाअति गुणा जाला दे सहिएएहि घेप्पंति ।
रइकिरणगुगहिआइ होंति कमलाइ अ कमलाइ ॥९८९॥

तुह वल्लहस्स गोसम्मि आसि अहरो मिलाणकमलदलो ।
इअ णववहुआ सोऊण कुणइ वअणं महीसमुहं ॥९९०॥

मह देसु रसं धम्मं तमवसम् आसं गमागमा हर णे ।
हरवहु सरणं तं चित्तमोहम् अवसरउ मे सहसा ॥९९१॥

राईसु चंदधवलासु ललिअम् आफालिऊण जो चावं ।
एक्कच्छत्तं च्चिअ कुणइ भुअणरज्जं विअंभंतो ॥९९२॥

लहिऊण तुज्झ वाहुप्फंसं जीए स को वि उल्लासो ।
जअलच्छी तुह विरहे ण हु ऽज्जला दुव्वलाणं सा ॥९९३॥

वारिज्जंतो वि उणो संदावकअत्थिएण हिअएण ।
थणहरवअस्सएणं विसुद्धजाई ण चलइ से हारो ॥९९४॥

सअलकरणपरवीसामसिरिविअरणं ण सरसकव्वस्स ।
दीसइ अह व णिसम्मइ सरिसं अंसंसमेत्तेण ॥९९५॥

सहि णवणिहुवणसमरम्मि अंकवालीसहीठे णिविडाए ।
हारो णिवारओ च्चिअ उच्छीरंतो तदा कहं रमिअं ॥९९६॥

सो ण त्थि एत्थ गामो जो एअं महमहंतलाअण्णं ।
तरुणाणं हिअअलुडिं परिसक्कंतिं णिवारेइ ॥९९७॥

सो सुद्धसामलंगो धम्मिल्लो कलिअललिअणिअदेहो ।
तीए खंधाहि वलं गहिअ सरो सुरअसंगरे जअइ ॥९९८॥

होमि वहत्थिअरेहो णिरंकुसो अह विवेअरहिओ वि ।
सिविणे वि तुमम्मि पुणो पत्तिहि भत्तिं ण सुमरामि ॥९९९॥

सज्जेइ सुरहिमासो ण आपणेइ जुअइजणलक्खसहे ।
अहिणअसहआरमुहे णअपल्लवपत्तणे अणंगसरे ॥१०००॥

